

東
華
續
錄

東華續錄

同治五十三

臣王先謙敬編

臣張式恭恭校

十一月壬戌朔添設湖北漢口鎮陸路千總一把總二經制外委
二額外外委四移原設中軍守備於漢陽府城右哨水師千總暨
額外外委於江漢關水師三司外委於蔡甸○予甘肅陣亡參將
張保安等祭葬世職○癸亥諭軍機大臣等伯彥訥謨祜奏馳抵
盛京沿途馬賊情形一摺奉省馬賊著名股匪已多在附近省城
一帶燒掠甚形猖獗並將八面城占踞前據恩合屢次奏陳已諭
令督兵勦辦並酌撥神機營勁旅諭令尙書文祥等統帶出關督
勦約計月杪可到伯彥訥謨祜見在商同達爾漢親王索特那木
彭蘇克挑選馬隊千名聽候調遣卽著相機辦理特索那木彭蘇

克本年年班卽毋庸進京以期會商進剿見在剿賊喫緊伯彥訥謨祜如不能抽身來京俟昭烏達卓索圖兩盟長到京時再行傳旨調撥蒙古官兵一體防剿如伯彥訥謨祜有必須來京與該兩盟長面商之處並著奏明辦理另片奏管帶昌圖廳勇丁之通判奎壽畏葸不前坐誤事機於地方搶案率多隱匿不報以致民怨沸騰盜風日熾等語著恩合恩錫查明嚴參懲辦以靖盜源而肅吏治毋稍徇隱此旨著恩合鈔錄一分迅速知照伯彥訥謨祜欽遵辦理並著趕緊覆奏候旨遵行將此由五百里各諭令知之尋奏遵查昌圖廳幅員遼闊西北相距六百餘里聞警往捕賊已遠颺奎壽於馬賊入境或督勇往拏或請兵會剿稟報有案尙非有意因循惟任內搶案多未呈報實屬隱匿已於疏防案內革職應否從重治罪出自 聖裁得旨奎壽業經革職著免其治罪○諭

前據吳昌壽奏稱捻蹤由襄城葉縣擾及舞陽後股由臨潁郛城竄至西平遂平等處當經諭令官文鄭敦謹飭令防邊各軍越境赴豫迎擊茲據官文等奏稱賊眾西竄召魯嚴飭諸軍夾擊一摺所陳情形尙在吳昌壽奏報以前見在賊匪既已擾竄舞陽後股又由徐州歸德一帶西竄郛城西平遂平一帶與張總愚前股合併勢益張湖北應山黃安麻城等縣距賊較近該逆有欲往湖北擄糧之說尤應防其竄入惟近防不如遠剿與其株守本境不如越境赴豫迎截著懍遵前次諭旨嚴檄成大吉駐紮麻羅之軍越境迎剿與吳昌壽所派各軍會合夾擊姜玉順等軍由西路轉向東北探賊所向與豫軍兩面夾攻以期速殄狂氛鄂省近來辦理會剿頗形遲滯官文鄭敦謹務當振刷精神實力整頓不可徒事敷衍有名無實致干咎戾姜玉順等軍既經赴豫援剿距鄂較

遠所有進止機宜卽著由吳昌壽節制調遣以一事權安襄鄖漢黃德等府屬團練卽著官文等飭令唐協和悉心經理務臻妥善官文等另片奏請將撥解都興阿成祿兩款餉銀統歸協濟甘餉每月三萬五千內覈計等語都興阿成祿等處軍營缺餉甚久需用緊急前據該大臣等奏請將甯夏月餉暫緩撥解經戶部議駁當經諭令官文等仍照前議籌撥著該大臣等仍遵前諭按月接濟不准遷延推諉貽誤事機其楊岳斌軍營應解之月餉三萬五千兩係屬專撥之款並著按月照數撥解不准以解都興阿成祿之款在內覈計抵算以杜牽混將此由六百里各諭令知之○甲子諭軍機大臣等閩敬銘奏據探豫省賊勢並籌辦河防情形一招逆匪竄至尉氏一帶仍恐合股東趨著卽檄飭王心安等軍分投扼剿毋稍疏懈濮范一帶河防因天寒冰結賊騎恐乘間偷越

閩敬銘見飭沿河各州縣營汛分段敲冰以杜竄越卽著督飭衛榮光等認真趕辦儻該員弁等承辦不力以致有名無實卽行從嚴參處兗沂曹濟道員缺已放文彬並以長賚補授沂州府知府該二員熟悉地方情形是以特加簡擢仍著閩敬銘飭令該員等力圖報稱將地方防守事宜妥爲布置以資得力將此諭令知之○命刑部右侍郎譚廷襄在總理各國事務衙門行走○乙丑調譚廷襄爲工部右侍郎吳廷棟爲刑部右侍郎汪元方爲戶部左侍郎宜振爲禮部右侍郎由工部調○丙寅諭內閣戶部奏遵議江蘇減免漕糧章程數目一摺江蘇蘇松常鎮太五屬編徵米二百二萬餘石原係彙同漕糧行月南卹局糧等款一串徵收自應如李鴻章等所奏無分起運畱支一體並減至以科則之重輕地土之饒瘠爲減成之多寡辦理亦尙妥協加恩著照所請所有蘇州府

屬額編米豆八十七萬七千五百六十四石零著減三十二萬六千六百三十二石零松江府屬額編米四十二萬七千四百六十一石零著減一十萬六千五百四十四石零太倉州屬額編米豆十五萬三千四百三十二石零著減四萬二千八百七十七石零常州府屬額編米三十五萬五千九百八十石零著減三萬五千五百九十八石零鎮江府屬額編米二十一萬四千七百三十五石零著減二萬一千四百七十三石零統計原額編徵米豆二百二萬九千一百七十四石零共減米豆五十四萬三千一百二十六石零仍應徵米豆一百四十八萬六千四十八石零著自本年爲始照減定數目徵收其各屬派減米豆數內尙有畱爲沿海墾區加減之數並著照章分別覈派應減科則另行造報經此次派減後該督撫等務當督飭所屬認真徵解不准再有官墊民欠名

目非實在旱潦爲災不准請蠲請緩如有捏報災歉蒙混呈報者
卽著嚴參懲辦其把持浮收等弊並著永遠革除以裕民生而重
賦課該督撫卽刊刻謄黃徧行曉諭務使實惠均霑毋任吏胥舞
弊以副朝廷破格施恩至意另片奏請將江蘇省實徵數目明定
章程等語江蘇省各屬浮收見在旣經裁減著該督撫將各屬向
辦徵收情形除應行酌畱外各計覈減浮收若干照浙江章程勒
爲成規分晰奏報以免影射浮勒之弊○丁卯曾國藩奏捻逆在
豐縣南北被我軍兩次擊敗仍竄山東該逆知東路防守甚嚴不
能偷渡運河復不敢久駐曹屬遂折而西竄知歸德有兵欲由舊
黃河北岸繞越直趨汴梁與張總愚合股駐紮歸德之周盛波探
得此信卽於十月初九日拔隊至睢州迎擊行至甯陵之趙村集
知該縣縣城被捻逆大隊圍攻勢甚危急卽整隊直逼城下時已

二更賊撤開東面任柱馬隊賴汶洸悍黨俱紮離城西南十五里周盛波恐賊至天明遁去議定乘夜攻之其弟提督周盛傳素善夜戰因設伏於黃河集分兵三路進攻洋槍如牆而進出賊不意任賴二逆揮令悍賊圍繞中路不料伏兵忽起橫出截擊鏖戰逾時賊紛紛敗潰我軍跟追四十餘里至睢柘交界賊狂奔向太康大路而去其殺斃悍賊六百餘名拔出難民千餘人解散脅從甚多該匪敗後由太康南竄行走甚速駐紮周家口之劉銘傳聞東賊回竄卽帶隊向東迎剿十二日途次接扶溝縣稟知縣城被圍求援甚急未刻馳抵扶溝縣之東宏濟橋見賊邊馬卽督馬隊分路並進賊見我軍驟至向西遁走劉盛瑞等追至城西里許遇賊馬步萬餘人分三大股將我軍包鈔中軍圍裹尤密劉銘傳令結陣自固四面環擊斃賊甚多連開炸礮打入賊陣該匪駭而狂奔

我軍追殺十餘里陣斬二百餘名槍斃一千餘名奪獲器械無算扶溝城圍立解據生擒賊供甯陵之役僅有任賴牛李等酋一股扶溝之役則已與張總愚一股相合刻下不敢東竄將謀擾及湖北接吳昌壽咨羣賊見聚襄葉舞陽一帶臣於十八日檄飭色爾固善張樹珊馬步兩軍移紮周家口騰出劉銘傳一軍作爲游擊之師謹遵前次諭旨不復拘泥十三府州之說卽南汝光許等郡隨賊所向跟蹤追剿其營務處李昭慶所辦游擊之師鞍馬尙未齊備待至臘底辦齊卽令李昭慶馳赴河南與劉銘傳各帶馬步萬人同作兩支游兵倣照格林沁之法與該逆縱橫追逐使之不得休息而濟甯徐州臨淮周家口四處之兵仍舊鎮駐不動以備賊匪流竄時迎頭截擊 上諭軍機大臣等該逆不敢東竄見在麇聚襄葉舞陽一帶謀擾湖北曾國藩見派劉銘傳一軍作爲

遊擊之師隨賊所向跟蹤追剿並令李昭慶趕辦馬隊馳赴河南與劉銘傳之軍相機追逐使賊不得休息所辦甚屬妥協具見老成謀國深合機宜卽著督飭派出馬步各軍迅速前進與豫省官軍前後夾擊以期迅殄賊氛其濟甯徐州臨淮周家口四處之兵卽著照舊駐紮以備賊匪流竄時迎頭截擊前有旨令曾國藩酌度軍情移營進紮本日該大臣摺內亦有不復拘泥十三府州之說與前旨適相脗合仍著該大臣斟酌情形相機前進庶居中調度呼應可以靈通想曾國藩必能因時制宜也賊匪窺伺鄂疆官文當懷遵前旨派兵迎擊痛加剿洗不得稍涉因循致形滋蔓曾國藩另片奏鮑超鑒於金口軍叛不敢輕收降卒若令少統數營赴豫剿捻必於大局有裨並稱進兵之路須以襄陽爲老營乃能北控南汝西蔽鄖陝凡銀米軍械等件應由湖北糧臺作主所籌

尙安年來捻匪出沒楚豫之交皆由無得力之兵痛加勦洗以致任其去來總未大受懲創鮑超帶兵素稱勇往若令簡練精銳申明紀律即可成節制之師該提督見在雖已赴江而豫省軍情較之江粵尤爲緊要卽著曾國藩檄調鮑超統帶新募各營馳赴湖北由襄陽一帶相機進剿一切進止機宜仍著曾國藩妥籌調度其鮑超畱江舊部仍令歸婁雲慶統帶勦辦粵賊並著傳知該提督遵照辦理至鮑超既赴楚豫勦捻必須寬籌餉項俾無缺乏所有銀米軍械等項卽著官文督飭湖北糧臺籌定數目按月撥解不准稍有推諉江南月協之餉卽由曾國藩咨商李鴻章酌定成數源源接濟將此由六百里各諭令知之○予積勞病故前任廣東按察使齡椿祭葬卹廕○戊辰諭軍機大臣等穆圖善奏甯夏攻剿喫緊協餉不濟請飭山陝四川等省速籌解濟一摺穆圖善

一軍自渡河以後兵勇口分僅發三月山陝兩省解餉既不足數四川協餉日久未據報解新募兩營月餉晉省並未解過分釐見在攻剿得手之際儻兵勇因飢潰散貽誤非輕著崇實駱秉章迅將協濟該營餉銀籌撥派員星馳管解赴甘交納並著劉蓉趙長齡王榕吉各將該省應解穆圖善營餉趕辦兩月迅速委解其新募兩營之餉一併補解毋得稽遲蒂欠以收飽騰之效穆圖善一軍前經都興阿奏請無庸赴陝業經降旨允准本日據穆圖善奏未能驟行赴陝情形大約相同卽著都興阿穆圖善仍遵前旨相機進剿迅將甯夏攻拔以竟全功毋再稽延時日將此由五百里諭知都興阿穆圖善崇實駱秉章劉蓉趙長齡並傳諭王榕吉知之○諭前因雲南軍事方殷亟須督撫大吏前往籌辦疊經諭令勞崇光林鴻年相機赴滇嗣據林鴻年奏報多次均託詞兵餉不

充意存觀望見僅移紮敘州仍未馳赴滇境勞崇光屢奉諭旨嚴催見在曾否由黔前進亦許久未見奏報均屬任意遷延茲據有人奏稱滇省及東昭尙屬狃安惟久無大員鎮撫馬如龍岑毓英等無所稟承人心易渙誠恐日久變生請另簡大員迅籌妥辦等語林鴻年由知府擢任封圻宜如何奮勉圖報乃竟遷延貽誤莫展一籌卽立予罷斥亦屬咎有應得惟滇事艱危多由於大吏之諉卸使一經退黜卽可置身事外轉得遂其畏葸自便之私著林鴻年懷遵前旨迅卽馳赴東昭認真經畫與護昭通鎮總兵楊盛宗籌撥兵練隨護入省並可清理鹽課釐金以資軍食勞崇光曾否起程卽著星速前往與林鴻年會籌迅辦儻再因循玩誤以無兵無餉藉詞延緩致滇中以久無統屬之故又生禍變必將該督撫從重治罪仍發滇省效力不得妄冀朝廷予以斥革轉可藉以

卸肩也至滇省與四川毗連滇垣一日不靖卽川防一日未能安堵崇實駱秉章素顧大局著仍懷遵疊次寄諭酌籌餉糈源源接濟所有滇中應辦事宜並著崇實駱秉章與勞崇光等隨時籌辦前有人奏馬如龍岑毓英均尙可用著勞崇光林鴻年傳知馬如龍岑毓英等慎守疆土共濟時艱毋得懷挾私忿致有貽誤至林鴻年前奏岑毓英與馬如龍意見不合未能浹洽恐係奸匪從中搆煽各等語著仍於羈縻之中寓防範之意是爲至要原摺著鈔給閱看將此由六百里各諭令知之○辛未諭軍機大臣等楊能格奏營員狡詐把持侵匿帑項請旨嚴行懲辦並請飭駐涇各營迅速前進各摺片據稱陝西甯陝營參將周顯承經雷正綰派辦營務支放餉需輒敢遇事把持與知州林發深狼狽爲奸致潰軍紛至涇州索餉該員復恐雷正綰參辦輒架詞陷害誣以叛逆重

情嗣見朝廷洞悉其枉復以餉絀兵譁雷正綰泣諭截回各實情四路上稟自相矛盾情節顯然林發深庸懦無能惟周顯承之命是聽是以同詞稟報周顯承又截回餉銀欲使各軍激變以實前言雷正綰奉命整頓諸軍周顯承謂廷寄係屬假造且以涇州糧餉有著不肯前赴平固該參將經手餉項數逾鉅萬輒稱固原兵變文案遺失掌管文案之知縣孟樹森查無下落藉詞捏飾豫爲冒銷地步又咨稱撥解餉銀一萬二千兩送至涇州二十里鋪被回匪搶失無存而查詢並無其事平日收支冊籍均交子姪收用委員不敢過問周顯承復帶兵攤派甯州百姓捐解麥糧民情惶惑將致變端各等語周顯承辦理營務糧餉既敢狡詐把持侵蝕帑項復敢帶隊勒捐實屬大干法紀著趙長齡暫緩前赴山西先赴慶涇一帶將此案秉公查辦如果訊有端倪卽著據實具奏將

周顯承革職歸案嚴行審訊其知州林發深有無通同侵捏情弊亦著一併查明請旨辦理該撫甫抵陝西無所用其回護務當覈實審辦以成信讞原摺著鈔給閱看至知縣孟樹森據楊能格奏稱於潰營之先已赴蘭州並未遇害亦無遺失文案情事著楊岳斌飭令孟樹森迅赴慶涇一帶聽候趙長齡查辦不得任其逗遛周顯承招集潰勇前已有旨仍歸雷正綰統帶著楊岳斌劉蓉嚴催涇州各營迅速前赴雷正綰軍營聽候調遣雷正綰一面另揀委員接辦營務該提督受朝廷如此厚恩儻再不痛自湔洗奮勉立功則國法具在不能屢邀寬典也將此由六百里諭知楊岳斌劉蓉趙長齡並傳諭雷正綰楊能格知之○賞通州王恕園煮賑米三百石○王申諭軍機大臣等前因恩麟等奏請領東三省丙寅年官兵俸餉銀兩當令戶部速議具奏茲據該部奏稱查明各

款備抵尙須另行籌撥除應領制錢一千八百串仍由盛京戶部金銀庫撥給外通共實應撥銀二十九萬四千九百三十四兩零擬撥長蘆丙寅年應徵鹽課銀十四萬四千九百三十四兩零山東地丁項下未解咸豐十一年京餉銀五萬兩山東鹽課項下未解咸豐十年京餉銀五萬兩直隸丙寅年旗租銀五萬兩以充東三省丙寅年俸餉之需等語著劉長佑閻敬銘遵照指撥銀數悉心籌畫迅速解赴盛京戶部交納其應領制錢一千八百串著由盛京戶部金銀庫撥給原摺著鈔給恩合閱看卽著恩合與吉林將軍黑龍江將軍均照議定折放章程覈實辦理並將用過銀各數於奏銷時照例題報如有贏餘於下年請領俸餉摺內聲明備抵此次所奉諭旨及原摺並著恩合知會吉林將軍黑龍江將軍一體遵照辦理另片奏山東等省欠解節年俸餉銀兩屢催未

解請旨飭催等語著劉長佑閻敬銘趙長齡吳昌壽劉蓉王榕吉各照該部奏催銀數竭力籌措趕緊解赴奉省以濟要需原片著鈔給劉長佑閻敬銘趙長齡吳昌壽劉蓉王榕吉閱看奉省勦辦馬賊需餉正殷該督撫務當星速報解源源接濟毋再推諉遲延致誤大局將此由五百里諭知恩合劉長佑閻敬銘趙長齡吳昌壽劉蓉並傳諭王榕吉知之○諭恩合等奏查明賊匪股數竄擾情形請飭熱河等處調兵堵剿並徐占一投誠相機辦理德英等奏捕盜官兵不敷遣用請將神機營畱演吉林官兵五百名調回遵查王起一股未至吉境各摺片協領恩科等所帶兵勇在流涯失利該匪等沿邊竄赴西北邊外哈力套立改舊道肆擾復有匪股闖入新民廳褻脅獄犯土匪向西北竄去此股賊匪來歷是否在東邊散出之王起大股由八面城一帶繞過抑由哈力套立改

竄回之周榮等恩合等未得其詳皮子窩海口地方見又有賊匪
四五百人在彼擾害亦未悉匪首何名足見平日勦捕盡屬虛文
偵探毫無實際實堪痛恨著卽飭豐恩等隊及穆錦等各就見有
兵力實力勦洗不得專待京兵致滋蔓延匪首徐占一見在旣已
投誠卽著恩合責令海盛安爲籠絡徐占一見隨扎朗阿等赴西
北邊外拏紅旗賊匪能否出力報效並著查明具奏恩合所請招
募練勇獵戶俟京兵到後併力攻勦之處著卽趕緊辦理不可有
名無實尙書文祥所統京兵不日卽到盛京將來與奉省各兵合
剿賊必向熱河之朝陽建昌赤峰竄去著麒慶卽派馬隊數百名
並朝陽一帶練勇在該處地面扼要堵截並著劉長佑徐廷楨迅
調沿邊各兵防守隘口不得令其闖入馬賊見有三股兵分力單
恐難制其死命著崇厚卽將洋槍隊揀派豫備調遣並著伯彥訥

謨祜遵奉前次寄諭督率備調之蒙古官兵嚴加防範理藩院傳諭各王旗一體派兵堵截不得任令此拏彼竄致成不了之局德英等著卽就派出兵力認真會剿該署將軍等所請將神機營畱演吉林官兵五百名盡數調回以資助剿之處著侯文祥到奉省後酌量情形再行妥籌辦理王起一股仍著德英等查明隨時防範將此諭知理藩院並由六百里諭知伯彥訥謨祜恩合德英劉長佑麒慶崇厚慶春並傳諭徐廷楷知之○諭林鴻年奏滇事難期速效請調員督練洋槍以期制勝一摺據稱探聞滇省回練或襲通海或擾廣南省回馬起隴等亦有帶兵占踞宜良縣署之事並分攻古城小倉各營寨楊盛宗所部兵練爲數不多難敷防剿近聞迤西匪徒多習槍礮欲圖制勝不可無所挾持請飭李鴻章迅撥李恆嵩來營訓練洋槍礮等語著李鴻章傳知李恆嵩酌帶

洋槍舊部練勇數人迅速入滇探明林鴻年行營前往聽候差委至滇事日形反覆尤須大吏馳往籌辦著林鴻年懍遵本月初七日諭旨星速前進毋得以守候李恆嵩爲詞仍復遷延畏縮自干咎戾其分擾通海廣南宜良之回是否卽馬如龍部伍何以肆行構變並著林鴻年傳知馬如龍岑毓英妥爲鎮撫毋任別滋事端其洋槍子藥各件應籌款前赴上海採辦卽著林鴻年隨時咨會李鴻章查照辦理將此由六百里各諭令知之○諭瑞麟等奏逆匪由連平復竄和平飭軍追擊劉坤一奏逆眾竄偪閩省邊境並請將席寶田暫行畱營各摺片粵逆竄踞連平之上坪等處經李福泰方耀等軍率隊進攻將其下坪煖水口礮臺平毀該逆焚燒上坪山寨竄由龍南復至和平縣屬地方尙係十月初十以前事據劉坤一所奏王開琳追賊於和平下車捕斬落後賊數十人該

逆遂於十三日竄龍川之小山墟又於十八九等日由興甯向平遠鎮平長驅而去遂據諜報已竄福建武平是逆蹤飄疾旬餘之內已竄擾三省邊境倏忽東趨江粵各軍並未大加懲創扼其奔突何能制賊死命劉典黃少春兩軍見率所部星馳回閩席寶田劉勝祥等軍復馳赴會昌扼剿著左宗棠劉坤一迅卽檄飭各軍繞出賊前迎頭截擊不得徒事尾追致令著著落後並著瑞麟郭嵩燾飛飭李福泰方耀等緊躡賊蹤實力追剿不准以驅賊出境爲了事鮑超見已抵贛卽著迅由安遠一路覘賊所向扼其去路毋任蔓延賊蹤已近閩邊左宗棠有節制三省之責務當一面嚴飭沿邊將士扼防本境杜其深入一面將閩粵各路官軍妥籌調遣總期四面兜圍爲一鼓聚殲之計其江粵各軍更不得藉口本省邊防徒事株守致令賊勢縱橫驟難戡事席寶田見帶精毅營

勦賊戰事方殷著准其暫行畱營俟此股髮逆撲滅卽行馳赴貴州臬司新任將此由六百里各諭令知之○諭阿克敦布等選牧羣官馬暨蒙古捐馬四百匹解天津練習○禮部尙書李棠階卒贈太子太保賞銀二千兩治喪予祭葬諡文清○調萬青藜爲禮部尙書以曹毓瑛爲兵部尙書董恂爲左都御史鄭敦謹爲戶部右侍郎李鶴年爲湖北巡撫

出直隸按察使遷

○命內閣學士李鴻藻在

軍機大臣上學習行走仍兼弘德殿行走○命詹事府右中允翁同龢在弘德殿行走○予福建陣亡遊擊陳韶舞祭葬世職○癸酉諭內閣李鴻藻奏稱軍機處爲政令所出方今時勢關繫甚重恐難勝任請收回成命俾得專心在弘德殿行走等語覽奏具見惻忱見值軍事未蕲庶政殷繁是以特簡李鴻藻進參樞務李鴻藻惟當勉圖報稱以副委任毋許固辭○諭劉蓉奏報署任日期

並請簡員來陝藉資調理一摺陝西軍務未竣防勦均關緊要該署撫仍當懍遵前旨力疾從公以圖報稱毋許固辭○以張樹聲爲直隸按察使

由江蘇徐海道遷

○命山西四川月撥銀二萬兩濟甘省

軍糈○甲戌諭軍機大臣等吳昌壽奏髮捻各逆分竄豫楚官軍分途追勦情形一摺賴牛等股匪由西平等處奔竄經蔣希夷督兵在西平之觀音堂洪橋口將該匪擊敗並於遂平上蔡等處連次獲勝賊匪奔竄確山掠及汝甯一帶其由裕州擾至唐縣之張總愚股匪經統帶鄂軍之總兵劉維楨設伏擊敗擒斬該逆首之弟張總志姜玉順復敗之於鄧州構林關該逆屢經挫敗正可乘此機會奮力進攻以期力掃狂氛姜玉順譚仁芳等軍不分畛域四面會勦毋稍鬆懈西平等處逼近應山黃麻一帶何以鄂軍並未出境迎擊著官文鄭敦謹嚴檄成大吉等軍迅速赴豫會勦仍

一面嚴守本境毋令賊蹤竄入不得再事玩延劉銘傳一軍業經
會國藩飭令赴豫著該大臣卽檄其迅赴確山與豫省馬德昭蔣
希夷等軍合力夾擊務將賴牛等匪股殲除湖北巡撫李鶴年到
任需時鄭敦謹未卸任以前所有鄂省軍務仍當認真籌畫布置
不得存五日京兆之見將此由六百里各諭令知之○乙亥諭內
閣前據閩敬銘奏審明已革副都統成保已革總兵郭寶昌不顧
主將分別定議罪名當經降旨交刑部速議具奏茲據刑部奏稱
該革員等隨同僧格林沁帶兵剿賊雖均無臨陣逃潰情事惟成
保充當翼長被賊圍困之際置主帥於不顧厥罪較重應比依官
軍臨陣者斬監候律擬斬監候郭寶昌所帶步隊前後開路接應
不能兼顧主帥且身受矛傷情罪有間應酌減一等擬發新疆效
力贖罪該革員俱係二品大員仍請旨遵行等語成保著照部議

斬監候解部監禁入於朝審辦理郭寶昌著照部議發往新疆效力贖罪○諭軍機大臣等張亮基奏逆匪竄撲思州等城均經兵練擊退並瀝陳黔省夷情及勞崇光隨帶林自清赴滇各摺片苗教各匪闖入思州府境攻撲城垣經知府梁金誥等督兵擊敗賊匪退歸鋪田其荆竹園教匪糾眾攻撲石阡府城亦經署知府田宗超等督練擊退殪賊數百名龍泉縣知縣李廷璧等督率紳團將圍撲龍泉之賊擊敗勦辦均尙得手著張亮基督飭思州石阡在事文武激勵兵練妥籌防勦並令龍泉令迅將彰教壩踞匪悉數殲除毋稍延緩張亮基所陳黔省夷務亦屬實在情形該署撫惟當斟酌機宜固不可與之爲難亦不必過爲遷就總以不激不隨爲維持大局之計勞崇光疊經降旨催令赴滇爲時已久並未見該督覆奏一字不知是何肺腑本日張亮基摺內有勞崇光見

將赴滇未及會銜等語是該督尙無起程確期實屬任意玩延不以國事爲重著卽懷遵前旨迅速赴滇不得再有遲延致干重咎林自清從前在滇滋事帶練赴川經張亮基設法遣散甫就鈴束勞崇光此次赴滇黔省豈無可用之人何以必欲隨帶該員以貽滇人之禍顛倒謬妄實堪痛恨林自清著不准勞崇光檄調隨營仍交張亮基嚴加管束儻勞崇光仍敢陽奉陰違視諭旨如弁髦惟有執法從事決不寬貸將此由六百里各諭令知之○諭本日據張亮基奏各省厯年欠撥黔省軍餉鉛本等項開單呈覽請飭分年補還一摺貴州歲需兵餉鉛本等項無不仰給鄰封自咸豐四年楊逆倡亂各省撥款概停所入歲減百餘萬而防剿之需歲增屢經奏請撥款奉旨嚴催仍屬毫無實際僅賴湖南勸捐一項苟延旦夕本年糧價斗昂數倍於前又值防剿喫緊練費軍火在

在均須籌備卽湖南四川偶撥一二萬兩亦屬杯水車薪萬難足用深恐兵潰援絕貽誤大局查自咸豐三年起至同治四年止各省欠解兵餉銀八百八十九萬三千七百三十兩咸豐四年起至咸豐九年止各省欠解軍餉銀四十三萬四千兩咸豐三年起至咸豐六年止各省欠解鉛本銀一百四萬八千五百四十兩湖南省欠解文職不敷養廉銀及兵糧米價等銀十三萬五千三百三十二兩統計欠解銀一千零五十一萬餘兩如按月撥解半成卽可得銀五十萬兩請飭各該省迅卽撥解以濟急需各等語所奏自係實在情形該省地方瘠苦需餉緊迫若不趕爲籌解恐事務益形決裂卽著四川湖北湖南廣東江西浙江福建山東山西河南陝西各該督撫暨福州將軍粵海關監督迅將單開積欠黔省兵餉鉛本及文武不敷養廉兵糧米價等項分作二十年清款各

照所欠總數以奉旨之日爲始按年撥還半成不准稍涉延玩原單著分別鈔給閱看將此由五百里諭知福州將軍四川湖北湖南廣東江西浙江福建山東山西河南陝西各省督撫並傳諭粵海關監督知之○丙子諭軍機大臣等恩合奏匪首投誠中途邀截夾板率黨徑去請調蒙古王旗官兵擬畱吉林馬隊赴昌圖招練各摺徐占一本非被剿窮蹙其投誠一節朝廷早知其不可深恃今於中途拆毀夾板竊看寄諭捆綁差役遂向古尼音布等託詞回邊布置徑率其馬隊而去桀驚情形殊堪髮指恩合尙欲令海盛善言開導恐狼子野心斷非羈縻所能就範著恩合等就見有兵力認真剿辦不准輕率議撫致墮狡謀文祥不日帶兵出關著卽察看賊情相機調度恩合另摺奏賊至廣甯屬界逼近城垣勢甚猖獗見因京兵未到派恩科赴邊外面見伯彥訥謨祜將達

爾漢王旗所備之馬隊一千名派員管帶赴奉省西路會合追剿並令恩科就近於昌圖地面招募練勇數百名協剿均著照辦各路兵勇漸集卽當密爲布置實力剿洗不得遷延坐待致誤事機卓保所帶吉林護從兵一百名著准其畱於奉省交富平阿帶領合隊前往西路追剿以資得力將此諭知文祥並由五百里諭令恩合富平阿知之○丁丑諭軍機大臣等總理各國事務衙門奏請分撥津郡洋槍隊防護營口一摺據稱見聞奉省盜風日熾並有欲擾營口之說該處額設防兵單薄萬一有警營口一無所恃文祥等見在帶兵剿辦儻賊勢稍重所帶之兵尙恐不敷剿捕勢難分撥兼顧擬將天津候調之洋槍隊兵一千名先行移緩就急酌量撥派等語沒溝營爲奉省財賦之區久爲賊所窺伺且該處爲各國洋商聚之所或有疏虞必致藉口虧折另生枝節亟應

豫籌堵禦以遏逆氛卽著照該衙門所擬將此起候調之洋槍隊撥派五百名馳赴營口扼要駐紮以資保衛其餘五百名仍著崇厚備齊聽候文祥福興等調遣此項派撥官兵五百名著崇厚於三日內飭令全數起程至應派帶隊官若干及如何分起進行之處著該侍郎妥籌辦理該匪既有欲擾沒溝營之說應如何相機布置嚴密防守著文祥福興酌度情形妥爲籌辦恩合惟當就見有兵力分設防剿迅掃逆氛毋得專待京兵置身事外坐誤事機將此由五百里各諭令知之○戊寅諭軍機大臣等官文等奏楚軍赴豫續獲勝仗並東路之賊西趨合股派兵防剿一摺所奏劉維楨等軍擊敗獲勝及擒斬張總志各情形與吳昌壽前奏大略相同見在任赴陳大溝賴汶洸牛落紅等爲一股竄至郭灘以東張總志程二老坎三老坎等爲一股竄至岡頭沙堰寨等處均距

新野最近兩路之賊會合一處亟應合楚豫之兵兩面夾擊以期
聚而殲諸著官文鄭敦謹督飭劉維楨等軍相機迎擊並著吳昌
壽懷遵前旨派兵剋期前進與楚省官軍前後兜剿就地殲除毋
令奔竄鄂疆又形滋蔓劉銘傳一軍業經會國藩飭赴豫省卽著
催令迅速前進探明賊蹤合兵剿洗其李昭慶馬隊已否成軍如
能趕緊啟行赴豫以輔步隊所不及較可得力並著該大臣妥籌
速辦毋失機宜將此由六百里各諭令知之○已卯諭內閣羅惇
衍奏人材不可終棄請將汪承元等量爲錄用人臣以人事君果
有材品俱優而沈淪淹滯未由上達者原應力加薦引以副朝廷
求賢若渴之懷若羅惇衍所保各員如杜翰匡源曾任卿貳大員
並在內廷行走因案獲咎其人之可用與否朝廷素所深知何待
該尙書瀆請至已革將軍國瑞幫辦僧格林沁軍務本年官軍在

曹州失利未能救援主帥厥咎甚重前年冬間蒙城解圍亦係僧
格林沁督同富明阿陳國瑞等力戰所致並非國瑞一人之功羅
惇衍專歸功於國瑞實屬錯誤已革侍郎成琦與端華拜認師生
並阿附肅順被參褫職縱如該尚書所稱才能肆應亦豈可復行
錄用已革臬司張集馨疊經熙麟李雲麟參奏先後經劉蓉查明
覆奏實有應得之咎業經加恩開復永不敘用處分並無不白之
冤豈得據德興阿一面之詞率行代爲剖辨前任浙江鹽運使朱
孫貽曾因御史汪朝榮保奏業經降旨將駱秉章覆奏所稱該員
乖張謬妄前後改轍各情明白宣示前任雲南鹽法道吳惠元曾
經羅惇衍保畱直隸差委未邀允准旋因該員告病開缺有心規
避奉旨勒令休致該二員卽再加錄用亦難望其得力前任奉天
府府尹德椿因案甫經革職前任太常寺卿湯修業已告病回籍

前任庶子袁保恆因事降調候補京堂汪承元前經陳孚恩保奏業以四五品京堂候補並非沈沒下僚其應否起用錄用之處朝廷自有權衡羅惇衍於以上各員毫無揀擇臚列滿紙率行陳奏殊屬冒昧不知體要著傳旨申飭○嚴禁各直省州縣私立班館濫用非刑○庚辰左宗棠奏陳逆汪海洋一股由江西定南敗竄廣東連平所轄上下坪一帶時遣賊黨擾及龍南始興邊境意由南韶奪路竄江西湖南邊界劉典全軍由南康進駐廣東南雄高連陞一軍由河源進駐長甯扼賊內犯廣東之路黃少春一軍由贛州進駐信豐扼賊旁竄江西之路賊知去路已斷忽由連平翻山繞竄和平興甯各境所過城邑皆繞道急趨突犯嘉應聞州城已於十一月二十一日失守旬日之間狂竄數百里將由閩邊以犯江西閩軍悉數入江入粵原爲截賊去路去閩日遠此次逆

賊乘虛回竄一無阻遏閩軍爲賊所隔回剿不能迅速已在意中查嘉應入閩約有三道一入永定一由鎮平入武平一由大埔入平和均不過百數十里而永定尤爲衝要臣見飭賴長率所部勇丁一千嚴扼之復檄藩司王德榜速率所部二千五百人由汀州拔營馳往截剿飛調黃少春由江西信豐過安遠以扼武平並咨劉坤一嚴扼會昌瑞平臣擬卽日率親兵八百人並調總兵楊和貴一營出屯琯溪以扼漳州之衝而兼顧平和一路俟各軍到齊再行前進督剿如賊竄江西臣自當遵旨赴江西視賊所向會同江西撫臣檄飭各軍相機妥辦上諭軍機大臣等該匪旬日之間狂竄數百里其欲由閩邊以犯江西已可概見著左宗棠檄飭派出各軍將由嘉應入閩之路分投堵截遇賊卽擊以剿爲防務將此股賊匪迅速掃除肅清疆圉以竟全功該逆既有圖竄江西

之勢亟應實力嚴防以扼其紛擾之路著劉坤一督飭防軍認真堵禦並嚴扼會昌瑞金一帶與汀州鎮沈俊德一軍聯絡聲援會籌剿洗爲一鼓聚殲之計嘉應州城被陷著瑞麟郭嵩燾將失事情形並文武下落查明具奏並著嚴飭卓興方耀等軍迅圖克復州城一面將此股竄匪痛加剿洗就地殄滅毋令再竄福建江西等省又成不了之局平和一路兵力較單該督擬出屯琯溪以扼漳州之衝兼顧平和一路卽著移營前進相機布置如賊竄江西並著左宗棠擇要駐紮會同劉坤一督飭各軍視賊所向力圖掃蕩該督成算在胸諒能統籌全局迅殄逆氛也將此由五百里各諭令知之○諭都興阿穆圖善奏官軍進剿奪獲要隘並歷陳聯捷辦理招撫情形楊岳斌奏曹克忠進援鞏昌城圍立解並探悉雷營陸續安撫各摺片甯郡踞逆恃其南路各賊堡運糧接濟見

經都興阿等督率將士攻拔賊圩兩座刻下賊糧垂盡攻勦正易得手著該將軍激勵各營兵勇併力進攻迅拔堅城毋再遷延干咎聯捷自靖甯專差佐領德清額帶有回人持函來至都興阿軍營聲稱固原等處回人俱經聯捷招撫見又據靈州馬朝清遞稟亦願投誠德清額先到金積堡與馬朝清面議就撫又到甯郡與賊目相見都興阿因馬朝清卽馬化澂乞撫緩軍是其故智且德清額係西安逃兵投效雷正綰軍營何以又持聯捷信函入甯城與賊目會商種種可疑且恐別有情弊一面飛咨聯捷詳細聲覆一面將德清額摘去頂翎押送平羅縣看管辦理尙屬認真可嘉之至著俟聯捷咨覆到日由都興阿查明德清額所持信函如係該佐領句通回逆捏造懈我兵心卽應就地正法如係聯捷不識事體輕重妄發信函卽著將聯捷據實參辦聯捷屢有嚴旨催令

出關不過欲借辦撫名目爲羈畱地步前奏馬化澂投誠各情朝廷知其不可深信當經諭令楊岳斌確查具奏仍著該督遵照前旨嚴密訪查迅速奏聞仍一面催令聯捷督帶所部迅速西行毋令逗畱甘省滋事致與該將軍該督辦理兩歧鞏昌城圍已解而該逆尙在郡城附近分股盤踞正西四十里外賊巢林立難保不乘閒再犯著楊岳斌嚴飭曹克忠一軍裹糧前進務將各處賊巢埽除淨盡廓清腹地以副委任前據楊能格奏參營員周顯承狡詐把持侵匿帑項各款當派趙長齡馳赴慶涇一帶秉公查辦並令楊岳斌速飭知縣孟樹森前赴慶涇聽候趙長齡查訊茲據該督奏涇臺糧餉異樣奇絀請飭陝西撫臣及慶陽糧臺力籌餉項解赴涇營等語摺內所敘周顯承出力各情與楊能格前奏大相歧異該督此奏自係尙未接奉前旨見在趙長齡計已起程著懷

遵前次寄諭將周顯承被楊能格奏參各款有無冤抑逐一查明如何持平辦理之處並著趙長齡會商楊岳斌據實具奏毋稍偏徇周顯承招集潰勇前有旨仍歸雷正綰統帶涇州存兵無多所有劉蓉楊能格接濟之餉應否解赴涇營抑或徑解雷營之處著該撫等會同楊岳斌雷正綰斟酌分別咨照妥辦固原州城見爲楊大娃子所踞雷正綰務當奮勉立功剋期攻拔以贖前愆並著恪遵前旨將雷恆李高啟迅速解赴蘭州交楊岳斌審辦該提督如敢瞻徇親故抗玩不遵則是自外生成斷不能稍從末減也再楊岳斌請將道員黎獻記名以臬司簡放覈與吏部新定章程不符著交軍機處另行存記將此由六百里諭知都興阿穆圖善楊岳斌趙長齡劉蓉並傳諭雷正綰楊能格知之○辛巳諭軍機大臣等麒慶奏見辦賊匪情形一摺據稱探得錦州府屬哈立力一

套改地方有賊首平四李瀉沅並女賊姜氏二名糾聚四百餘人
占踞搶掠見聚新立屯有欲出清河門之說其東來之賊徐占一
王七烏痣李等約二千餘在新民廳劫獄焚署裹脅良民不知意
欲何往業由朝陽縣調練防堵麒慶亦飛催各路兵勇分投抵禦
請寬籌餉項並迅飭理藩院札卓索圖等盟派馬隊會剿仍飭各
處截剿等語賊首平四等糾眾搶掠見聚新立屯趨重熱河麒慶
已派馬隊並朝陽練勇防堵著卽嚴飭派出之協領德玉等督帶
馬隊覘賊所向迎頭剿擊卓索圖昭烏達兩盟兵疊經諭令理藩
院傳諭各王旗一體派兵堵截著理藩院懍遵前旨再行傳諭各
該王旗認真堵截不得以空言塞責致完善地方被擾麒慶仍可
相機檄調以期得力徐占一等股見在何往著恩合查明具奏一
面飭令派出各軍實力剿洗不得以驅賊出境遂謂可以卸責文

祥福興想已抵關卽著多發偵探酌度機宜會師進剿各路官兵如何打仗不力防範不嚴被賊竄擾者卽著指名嚴參毋稍姑息賊蹤紛竄靡定劉長佑長善徐廷楷務當督飭兵弁力固藩籬毋任匪眾闖入本境麒慶請由部庫先行撥銀二三萬兩著戶部速議具奏本日據御史汪朝棨奏王洛月餘黨尋仇搶劫官紳無敢過問團練始勤終惰請飭直隸總督嚴行查辦等語著劉長佑查明具奏王洛月餘黨仍飭地方文武按拏懲辦並令各地方官將團練保甲事宜認真經理原片著鈔給劉長佑閱看將此由五百里諭知文祥福興恩合劉長佑麒慶長善並傳諭徐廷楷知之○諭張凱嵩奏南甯官軍殲除援賊見飭乘勝圍攻一招逆首孫仁廣等屯踞那檀山澤各巢爲日久此次劉培一等督軍進攻堅巢未拔而士卒頗多傷亡該逆復糾貴縣莠民眾至數千出屯橫

州之廟相等村以圖牽掣經官軍連日攻勦將其盤踞之屯羅廟相等十餘村賊壘數十座全行踣毀生擒逆酋林得友林侍任等數十人該逆外援既敗賊膽已寒正當乘此聲威迅克堅巢以圖藏事著張凱嵩卽飭劉培一覃遠璉等會督各軍悉力圍攻務將那檀山澤各匪日勦洗毋再宕延廣東之賊見由和平竄往鎮平嘉應一路西省邊防自可稍鬆該撫見已抵潯卽著馳赴南甯親督各軍進勦毋任老師糜餉致誤事機那檀股匪逼人通款投誠如果能倒戈殺賊將孫芒廣捌獻亦不妨從權招撫勻出兵力以合山澤之圍若徒以乞撫緩師仍存首鼠之見卽當一意勦辦毋爲所愚將此由五百里諭令知之○諭勞崇光奏起程赴滇並請飭撥餉需一摺滇中軍務喫緊勞崇光已於十月十八日統帶張文德等軍起程赴滇著俟到曲靖平彝一帶查看情形卽行赴

省督飭馬如龍等進規迤西殲除杜逆惟軍行必須餉隨自應豫籌接濟著崇賢駱秉章迅將前署督潘鐸奏准由川省籌撥之五萬兩剋期委員解赴滇省交勞崇光行營以資飽騰毋再延緩將此由五百里各諭令知之○雲貴總督勞崇光奏遵覆貴州公事惟與張亮基和衷共濟如有不合亦必據理直言不肯遷就巡捕商紹祖於署仁懷同知任內因家丁因順劣蹟業已撤任提審自問尙無回護查林自清雖年少好動打仗尙屬奮勇擬請將該領隨帶行營差遣得旨林自清從前在滇滋事該督豈無聞見何以復欲令其帶練入滇在該督止思藉以自衛而於滇省貽禍無窮顛倒謬妄莫此爲甚著懷遵十一月十四日諭旨不准檄調隨營仍交張亮基嚴加管束○予廣西陣亡副將周開麒祭葬世職○予山西殉難府經歷陳步洛等建祠○癸未予攻剿甘肅階州陣

亡將弁勇丁建祠○乙酉諭軍機大臣等楊岳斌奏探聞雷營兵潰見籌布置並請調鄰省援兵一摺雷正綰所部潰變退回固原疊據劉蓉楊能格等將大概情形馳奏曾經諭令楊岳斌妥籌辦理並因甘省兵力單薄諭令崇實駱秉章酌度情形將周達武所帶十五營抽撥赴甘茲據楊岳斌奏稱雷營兵潰探報傳聞不一曹克忠一軍兵餉不繼該督帶赴甘省各營亦不敷分撥請調周達武援甘等語四川各路軍情見尙安謐自應先其所急力顧西陲著崇實駱秉章卽飭周達武統帶所部迅速前赴甘肅交楊岳斌調遣毋稍遲誤其應用餉銀卽由川省源源接濟不得稍有缺乏雷正綰潰勇見在是否一律安輯仍著遵照疊次寄諭妥爲籌辦成祿聯捷已否起程並著催令星速前進昨據廣鳳奎昌奏古城奇台濟木薩等城業經民勇收復亟應乘機迅赴也將此由六

百里各諭令知之○復甘肅軍營病故已革安徽巡撫翁同書原
官予祭葬卹廕謚文勤○予江西陣亡從九品王志成祭葬世職
○丙戌奉天馬賊竄朝陽諭麒慶等會兵剿捕○丁亥諭軍機大
臣等昨因奉天大股馬賊由清河邊門竄至熱河朝陽縣街肆行
焚掠當經諭令文祥福興斟酌情形能否分兵兼顧相機辦理並
諭令劉長佑多撥馬步兵勇赴熱河助剿酌撥勁旅數百名交徐
廷楮統帶嚴防邊口因思此股馬賊蹤迹飄忽勢燄鴟張沿邊隘
口甚多恐徐廷楮一人帶兵不足以資堵禦劉長佑節制畿疆沿
邊防務本係該督專責見在南路捻匪併歸豫省南陽等處距大
名一帶較遠畿南防務稍鬆北路情形喫緊著劉長佑卽行出省
挑選得力兵勇酌帶若干名親赴沿邊隘口擇要駐紮嚴密偵探
督同徐廷楮實力防堵毋令賊蹤竄入口內仍一面選派勁旅會

同熱河派出官兵馳赴朝陽實力勦辦儻堵勦不力致令賊氛延蔓必惟劉長佑是問畿南一帶防兵如有可以抽調之處著卽酌量調赴北路並須多調馬隊以備追擊迎勦之用劉長佑出省以後所有南路防務卽著李鶴年督辦尋常日行事件卽由李鶴年代拆代行遇有緊要事件仍商同劉長佑辦理李鶴年俟劉長佑回省後再行交卸徐廷楷身任直隸提督沿邊防務儻有疏虞亦難辭咎古北口本有旗營駐防喜峰口冷口羅文峪等處均有山海關旗兵駐守連成長善賁無旁貸均應督飭該處防兵實力守禦如被賊蹤闌入則咎無可諉不得豫存推卸之心自干罪戾麒麟慶前次疏防馬賊闌入喜峰口此若再縱令賊匪闖入邊關震驚畿輔自問當得何罪此股馬賊已有二三千名之多赤峰縣街尙有大股賊黨盤踞該都統務當就見有兵力設法分投截勦不可

令其句結合併致成燎原之勢仍一面知照蒙古昭烏達等盟派兵會剿熱河避暑山莊爲禁禦重地尤當備兵嚴加防護茅津壩等處爲朝陽赴熱河要路均應派兵扼堵劉長佑仍遵昨日諭旨多派勁旅速赴熱河妥籌剿辦天津尙有洋槍隊五百名仍著崇厚脩齊軍械聽候續調文祥福興所部各營爲數較單能否分撥熱河助剿之處著酌量奉天熱河兩處緩急情形相機辦理一面奏聞前諭阿克敦布廉至挑備察哈爾官兵一千名聽候調遣著該都統等勤加操練以備調用務須實力奉行不得有名無實仍須時加偵探整頓各營武備以防賊匪窺伺毋稍鬆勁將此由六百里諭知文祥福興劉長佑麒慶阿克敦布崇厚李鶴年連成長善廉至並傳諭徐廷楷知之○諭瑞麟等奏逆匪闖入嘉應州城見籌會軍剿辦一摺前據左宗棠劉坤一先後馳報失守疊經諭

令各該督撫相機剿辦茲據瑞麟等奏該逆由麻布岡突抵嘉應州城兵勇力竭致被闌入署知州程培霖巷戰受傷倒地團勇披之而出遊擊英秀與其餘文武不知下落各等語見在方耀鄧安邦等軍已進紮嘉應州屬闌石徑心卽著飭令約會各軍同時進取並著督飭李福泰張銑翟國彥鄧紹忠等屯紮要隘力籌堵剿至卓興一軍因欠餉過鉅裁撤回潮不知瑞麟郭嵩燾平日所籌畫者何事此時方耀等軍剿賊正當喫緊該督撫等務寬籌餉項源源接濟俾資飽騰毋得再有貽誤瑞麟等摺內有左宗棠卽日起程赴粵居中調遣等語左宗棠如能迅速赴粵督剿不特調度靈通且可堵賊入閩之路於大局最有裨益該督素稱知兵想必能通盤擘畫蕩定賊氛也賊匪聚於一隅利在會剿著劉坤一懷遵前旨督飭防軍認真堵禦並酌派勁旅數千越境會合閩粵之

軍四面圍攻迅圖勦洗毋得稍分畛域將此由六百里各諭令知之○定緝獲馬賊獎敘章程○戊子王榕吉請畱已革副都統遮克敦布辦理河防不許○己丑諭內閣向來各州縣拏獲騎馬賊匪須審明在三人以上持有器械賊證確鑿者始按律問擬斬決茲據長善奏稱拏獲搶奪人犯無論人數是否在三人以上並不論賊之多寡但係騎馬執持刀械乘機搶奪者經該地方官訊明及覆訊屬實卽行就地正法似此變通辦理較爲簡便等語此等馬賊肆行搶掠擾害閭閻豈可於訊明後久稽顯戮嗣後直隸奉天熱河各省於拏獲馬賊人犯卽著照長善所擬新章辦理以昭炯戒而靖地方○諭軍機大臣等文祥等奏行抵山海關探聞賊情請調直隸馬勇隨同進剿馬匹倒斃請將帶隊官暫革請調蒙古捐輸馬匹麒慶奏請簡大員督辦熱河軍務長善奏訪獲馬賊

請就地正法各摺片各股馬賊人數眾多文祥等此次所帶官兵馬隊本形單薄而奉省東南北三路之賊並起誠恐兵分力單不敷調遣文祥等請將見紮玉田一帶之總兵劉景芳所帶馬勇二百名先行札調著劉長佑卽飛飭該總兵統帶所部隨同文祥等進剿應需月餉仍由直隸轉解如有不足由文祥等協濟文祥等所請調棍楚克林沁等所捐馬共五百匹著理藩院轉行該王公務須挑選一律口輕膽壯馬匹剋日解赴軍營以備征剿之用並由文祥等飛速行文調取以期迅速麒慶奏請簡派大員督辦熱河軍務並請續發援兵以壯聲勢該都統平日旣不知振作臨事又復思諉卸殊負朝廷委任之意見在知兵大員實難其選熱河兵力又不足恃著麒慶與文祥等妥商辦法奏聞一面就見有之兵實力防剿毋任蔓延劉長佑身任封圻責無旁貸著揀選二十

六日諭旨帶兵出省擇要駐紮並派得力兵弁馳赴朝陽一帶助剿毋稍遲誤文祥福興距朝陽尚遠該處軍務應如何妥籌辦理之處著探明速奏長善奏拏獲搶奪人犯無論人數賊數但係騎馬執械乘機搶奪者訊明後卽就地正法等語此次拏獲之陳潮深等二名卽照新章辦理供單二件著鈔給文祥福興劉長佑麒慶閱看文祥等另片奏賊以邊外爲窟穴官兵道路生疏若得該蒙古兵由北會剿與官軍夾擊方足以制奔竄請飭伯彥訥謨祜於到京後面見各旗年班蒙古商議妥協後迅卽回旗等語伯彥訥謨祜尚未到京著俟到京後再行面諭辦理將此由五百里各諭令知之○諭崇實駱秉章奏攻剿滇黔各匪見籌分兵布置情形一摺川省東南隘口紛歧黔匪屢次竄至敘永邊境其綦江邊界黔匪並圖擾犯果後各營後路雖經川軍分路進剿疊有斬擒

而官軍傷亡亦復不少見在竄撲敘永之匪仍踞川黔交界洗脚溪等處綦江之匪仍在鏵尖山憑壘死拒滇境苗匪陶僞元帥復擁眾竄至牛街土匪漆新大等分股逼近敘南筠連一帶防務諸形喫緊崇實等見添調總兵成耀星等軍前赴綏陽畱胡中和七營分防敘南嚴扼滇匪並檄飭周達武親帶六營赴南路敘永綦江一帶視何路軍情緊急卽赴何路截擊布置尙屬周妥卽著崇實駱秉章督飭派出各軍嚴密防剿毋任滇黔沿邊各匪闖入川疆並著勞崇光張亮基林鴻年飛檄滇黔邊防諸軍與川軍合力夾擊迅殲醜類毋得專恃客兵一籌莫展貽禍鄰封勞崇光已據奏報由黔起程見在行抵何處林鴻年屢奉諭旨嚴催入滇何時起程進紮何處並著迅速馳奏將此由五百里各諭令知之○諭訥爾濟奏巴里坤東西兩路賊匪情形一摺據稱奇台縣知縣恆

頤帶勇西剿由木壘進至阜康迤西被賊攻撲眾勇潰逃恆頤不知下落賊匪見在木壘盤踞等語奇台濟木薩城垣前月甫據該大臣等奏報收復此次官兵復行失利賊勢又復猖獗訥爾濟摺中並有奇古一帶復失恆頤不守木壘輕進濟木薩以致得而復失之語是否該二城又經失陷聲敘殊未明晰關外兵勇全不可恃成祿聯捷之軍屢經申斥仍在甘境逗留實屬疲玩已極著楊岳斌傳諭該提督等迅卽整隊出關會同訥爾濟等籌商進剿總期得步進步爲節節進取之計儻再遷延國法具在不能爲成祿等稍貸也訥爾濟見派已革防禦惠琳與勇目張和會帶戶勇二千前赴木壘進剿此等民勇雖不可恃然藉以牽制賊蹤亦未始非計著訥爾濟激勵該民勇等力籌堵禦毋任賊氛日肆蔓延其勇目張和一名卽准由該大臣賞給五品頂帶以資統帶哈密賊

匪雖無西犯情形訥爾濟等仍當嚴爲備禦毋稍疏虞將此由五百里各諭令知之○廣浙江永康縣學額三名○以四川松潘廳肅清出力員弁獎敘有差○于貴州陣亡副將劉洛望祭葬世職○庚寅諭軍機大臣等本日伯彥訥謨祜到京備述馬賊情形與麒慶文祥等所奏大略相同見在各旗年班蒙古來京在邇當令其商議妥協後隨同伯彥訥謨祜迅卽回旗豫調馬隊協同防剿文祥等屆時卽可斟酌情形相機調遣會合夾擊以杜奔竄熱河兵力本不足恃竄擾朝陽賊匪爲數太多亟應添兵剿捕文祥等前奏於月之二十六日由山海關起程赴奉刻下是否業已成行甯遠係必由之路由甯遠赴朝陽不過一百數十里儻文祥等能帶馬步各隊先剿朝陽之賊將賊匪逼向東趨而以大軍急躡其後與奉省官軍兩面夾剿或可聚而殲旃著文祥等酌度機宜妥

籌辦理如別有所見亦著將軍情緩急詳悉奏聞朝廷不爲遙制也正在寄諭間據恩合奏探悉賊匪大概情形暨徐占一見尙安靜及花里雅春力解廣甯之圍各摺片賊匪王起等糾眾圍撲廣甯經協領花里雅春督兵奮擊力解城圍甚屬可嘉見在王起一股竄及朝陽周榮姜三疙疸一股由孟古勒津地面竄至法庫邊門滋擾其勢方張恩合已咨調富平阿統帶馬步各隊回省布置卽著該將軍將省城防護事宜妥籌辦理並與恩錫等督飭各路兵勇及地方文武隨時防剿毋得株守畏難任賊滋蔓盤踞金州皮口賊目康泳澳等繳械投誠眞僞均未可定恩合務當妥慎籌辦於該降人等到省後嚴密防範隨時察看毋墮詭謀徐占一覆轍具在總當引以爲鑒至恩合所奏徐占一見尙安靜不可復行激變等語著文祥等於到奉省後察看情形妥爲籌辦其康泳澳

等之投誠是否足恃並著與恩合詳籌處置毋稍大意恩合等摺
著鈔給文祥等閱看將此由五百里各諭令知之○諭鮑超奏會
合舊部抵防並請督辦大臣調度一摺髮逆大股盤踞嘉應州城
江閩粵三省地界毗連此剿彼竄非合三省兵力四面圍殲勢將
復行滋蔓尤須有督兵大員節制調度方足以一號令而齊進止
見據鮑超奏稱各軍越境會剿未進之先各存意見臨期之際牽
制堪虞爭功諉過窒礙多端非督師大臣親臨前敵驅策羣力不
免耽延時日虛糜軍餉等語該提督老於戎行洞悉軍情利弊所
奏深合機宜左宗棠前辭節制三省之命朝廷未經允准疊經諭
令視賊所向馳赴江粵督兵會剿該督旋因賊陷嘉應奏明帶兵
赴粵督剿著卽調齊江閩粵三省官軍四路進逼務乘賊勢窮蹙
之餘就地殲除不可再令賊蹤他竄又成燎原之勢並著該督親

往嘉應視師以期呼應靈通鮑超所部見已會齊駐紮會昌聽候左宗棠調遣著該督卽約會閩粵各軍訂期前進並檄令鮑超所部合力進攻毋得稍分畛域坐失機宜所有鮑超軍營糧餉卽著該提督行知廣東江西各督撫嚴檄地方官設法轉運毋許貽誤前經諭令曾國藩將鮑超一軍酌調赴豫剿辦捻匪見當江粵軍務喫緊之時鮑超駐軍會昌距嘉應甚近卽著該提督暫緩赴豫俟髮逆蕩平後再行聽候曾國藩檄調入豫助剿捻匪將此由六百里諭知左宗棠並傳諭鮑超知之○諭前據曾國藩奏鮑超一軍赴豫有益當經諭令曾國藩酌量檄調本日據鮑超奏稱馳抵江粵邊界已於本月十二日移紮會昌見聞疎逆大股盤踞嘉應州城擬卽由會昌前往嘉應會剿等語髮逆竄擾粵東勢尙猖獗鮑超就近由江赴粵剿辦此股必能得手此時若將該軍改調赴

豫則舍近圖遠往返又需時日疲於奔走殊失機宜就目下軍情揆其緩急莫若即將鮑超一軍暫留江粵勦辦此股髮逆以期迅速蒞事所有鮑超一軍卽著該大臣暫緩檄調俟髮逆勦平後再行飭令赴豫助勦近日豫省賊勢若何劉銘傳等軍有無戰事均著隨時詳細奏聞以慰廑繫將此由六百里諭令知之○辛卯諭軍機大臣等劉長佑奏遵派官兵前赴朝陽勦匪擇要駐防關隘並調兵出省防邊各摺片沿邊各口地勢延長建昌營地偏於東三屯協地偏於西劉長佑見商令徐廷楮多設偵探覘賊所向於緊要之區駐紮以便援應著卽照所議辦理並揀調通永鎮精兵五百名作爲徐廷楮親軍卽著劉長佑飭令該提督勤加訓練一面飭令遊擊阿洪阿等在各關隘相度地勢嚴加備禦以免賊騎闖越劉景芳所部馬勇二百名前經有旨諭令隨同文祥福興進

勦文祥福興能否先勦朝陽之賊尙未可定劉長佑所擬添調之天津鎮兵五百名併歸該副將管帶速赴朝陽之處卽著劉長佑迅速咨知文祥福興妥商辦理以免歧誤該督見挑步勇千名馬勇三百餘名交總兵劉榮帶往沿邊防禦並遵旨出省親往督辦務卽迅速馳往北路察度各關隘情形督飭徐廷楷認真巡防仍一面挑選勁旅會同派出官兵迅赴朝陽實力勦洗不可稍涉遲緩將此諭令知之○是月蠲緩山東濟甯等七十一州縣德州等五衛被擾及水旱蟲災直隸安州等八十州縣水旱雹災新舊額賦雜課暨開州等三州縣被水順天宛平縣被旱本年額賦緩徵山西平遙縣被水本年額賦

東華續錄

同治五十四

臣王先謙敬編

臣張式恭恭校

十二月壬辰朔曾國藩奏欽奉諭旨以豫省賊數益眾飭臣督勦
臣奉命勦擒業經奏定徐州臨淮濟甯周家口四處設立重兵此
四處臣皆可以駐紮特以東北則畿輔爲天下之根本東南則江
蘇爲臣軍之根本故臣視東路略重駐徐州略久耳白十一月初
間擒匪由山東全數竄豫臣即擬進駐周家口因李昭慶一軍鞍
馬未齊不克遽行赴豫又僧格林沁畱遺馬隊汰存一千八百有
奇及新調之察哈爾馬隊一千馬匹倒斃甚多派員出口購買回
營遲早難定臣見擬派李昭慶於正月統帶萬人赴豫與劉銘傳
分途進剿就見有馬匹先行勦辦所恃步隊尙多足以輔騎兵之

不及臣亦於正月進駐周家口就近調度惟東路終不放心擬令

李昭慶由徐徑赴河南臣先赴濟甯兗州曹州一帶察看情形並

查閱黃河礮船再由歸德陳州以抵周家口庶地勢之孰重孰輕
畱兵之宜多宜少胸中較有把握再銅山沛縣等處湖團係咸豐
四五年間山東難民遷徙該處開墾微山湖涸出之地久之聚至
數萬人占地百餘里當時官吏權宜辦理設局丈量定以科則納
租充餉在東省難民以爲全係湖荒之地在銅沛居民則以爲霸
占有主之產爭訟多年屢釀巨案本年十月賊竄沛縣逆首任柱
牛洛紅賴汶洸等皆住湖團之內據獲賊供稱係湖團邀約而來
沛民平日本與湖團爲不解之仇至是愈以團民勾捻紛紛控告
而湖團中如唐守忠父子罵賊殉難全圩房屋焚燒殆盡則又忠
節昭然乃沛民仍以叛逆目之若不早爲之所則沛民與團民必

且械鬪不休而良團與莠團亦復眞僞莫辨臣擬將通捻之團酌

量懲辦其餘數萬人全數資遣回籍見已派員前往山東鄆城鉅野等處查看該團民原籍如尙可以安插則遣之東歸在沛縣可免占產之訟在徐州亦無招捻之窩如不可安插再當另行籌辦

上諭軍機大臣等官文鄭敦謹奏鄂軍援豫獲勝並賊勢東趨請飭鮑超取道黃麻迎頭截擊吳昌壽奏正南股匪竄至光羅官軍追剿獲勝並收復構林關寨各摺片張總愚等前由涼口襲踞構林關經官文等檄飭姜玉順等軍會合豫軍進剿賊勢窮蹙乘夜棄寨向鄧州一帶奔竄遂將構林關收復見在張逆在新鄧滋擾其勢甚熾賴牛等股又分擾遂汝正確大股直抵信陽逆氛漸偏黃孝鄂省邊防正當喫緊著官文等嚴飭成大吉速赴孝感之三里城小河溪一帶迎剿毋令闖入鄂境如該匪被擊北竄官文

等仍當速飭各軍跟蹤追躡以收聚殲之效據吳昌壽奏髮捻各逆圍攻光山縣之杏山寨並攻撲州城均經官軍擊退見飭馬德昭滾營前進務將光州踞匪剿洗等語是東南逆股不但窺伺鄂邊勢將蔓延皖境豫省兵力不敷調遣曾國藩有節制諸軍之責自必統籌全局力圖兼顧著卽迅催劉銘傳督率所部會同馬德昭等剿除光州一帶踞匪毋稍遲誤李昭慶訓練馬隊計已將次成軍並著飭赴豫省會剿與步隊相輔而行則剿辦自易得手光州毗連霍六該匪乘隙他竄是其慣技喬松年務當飭令英翰督兵迎擊堵剿兼施毋得株守一隅貽誤事機張逆一股雖姜玉順等進剿屢有小勝而逆燄未衰必須豫省兵勇緊躡賊後兩面夾擊方可迅速奏功著吳昌壽嚴檄宋慶等督隊前進與姜玉順譚仁芳等軍分路兜剿如再遲延玩誤卽著據實嚴參毋得稍涉瞻

徇致干咎戾汪逆竄踞嘉應州城昨據鮑超馳奏擬由會昌赴粵
勦辦是鮑超一軍急切不能到豫官文亟須另籌兵力扼紮黃麻
豈可專待此軍致滋貽誤吳昌壽另片奏副都統安住所帶馬隊
倒斃馬匹請免其賠補等語安住馬隊既據該撫查明黑龍江倒
斃之馬其原領之時已形疲瘦並非該營總等有心玩視所有黑
龍江大凌河戰馬倒斃三百八十九匹著從寬免其賠補嗣後該
副都統安住務當督飭該營總等盡心收養俾令一律臙壯如再
有倒斃卽責令該營總等照數賠補決不寬貸正在寄諭間據曾
國藩奏遵覆寄諭見擬派李昭慶於正月統帶萬人赴豫與劉銘
傳分途進剿該大臣亦於正月進駐周家口並先將湖團設法遣
散安插等語所籌均屬妥協著卽飭令李昭慶就已練之兵見有
之馬先行帶赴豫省與劉銘傳會合勦賊湖團構釁已久與居民

爭執各不相下若不早爲之所恐致釀成巨案曾國藩擬由濟甯
兗曹一帶察看情形著卽會同吳棠閻敬銘妥籌贄遣將通捻之
團認真懲辦以絕後患吳棠閻敬銘務將東省難民遷徙銅沛者
妥爲安插俾曾國藩無東顧之憂得以尅期赴豫督剿各匪將此
由六百里各諭令知之○予河南陣亡參將張世順等祭葬世職
○予故甘肅巴里坤總兵官成發翔入祀昭忠祠並建祠○癸巳
諭軍機大臣等吳棠奏陳國瑞患病瘋狂押送回籍請旨革職並
請飭湖北督撫派員妥視各摺片本日已降旨將該總兵革職矣
所有該革員售鹽贄本提充淮徐兵餉寶應田產歸公戰馬交營
各節均著照所請行其另存見銀二萬五千兩已由吳棠封解官
文卽著官文鄭敦謹飭司存儲分年交陳國瑞收領以資回籍生
計該革員見旣病瘋卽使他日就痊而喜怒無常性情獷悍官文

等亦不可再任以兵事致滋貽誤第念其從前宣力戎行戰功疊著今竟成廢情殊可憫官文等務當隨時派員妥視毋令失所其瘋疾能否痊愈並著隨時察看具奏以副朝廷保全愛惜之至意原摺片著鈔給官文鄭敦謹閱看將此各諭令知之尋奏陳國瑞業經到籍察看病勢漸可痊愈其胞兄陳光榮堂兄陳光藻已出結領回原籍應城縣醫治解到銀兩存漢黃道庫以便該革員隨時支領以資養贍報聞○諭李瀚章奏遵籌湖南省東西兩路防剿情形等語汪逆竄至粵東嘉應失陷雖距湘境稍遠惟該逆不突狼奔紛擾靡定仍恐窺伺江楚湖南邊境防務未可稍鬆著李瀚章督飭趙煥聯等嚴密防範毋稍疏虞劉連捷等軍勞勩日久卽著陸續裁撤俾資休息欠餉仍由湖南江西補給並著知照劉坤一妥爲辦理黔省苗匪經該撫檄令周洪印等越境分路剿辦

見在楚黔毗界肅清而黎平天柱匪類尙多時虞出沒仍著檄飭周洪印督率各軍接捕餘匪毋令稍畱遺孽總期激勵將卒步步進規爲次第廓清之計儻黎平等處稍有警信仍卽相機援應以固邊防將此由四百里諭令知之○論趙長齡奏遵旨馳赴慶涇一帶查辦事件楊能格奏營員帶隊搶掠槍斃生員攻堡淫擄僞斃多命並帶隊搶奪糧臺餉銀各摺片覽奏實深詫異前因楊能格奏參周顯承狡詐把持侵蝕帑項帶隊勒捐等情當經諭令趙長齡先赴慶涇一帶查辦如訊有端倪卽將周顯承奏請革職嚴審茲據楊能格奏周顯承親帶三營馬隊至甯州親兵各入民家搶掠淫擄無所不至槍斃增生粟承祚復分隊駐酒頭堡及太昌城外將兩處百姓搶掠一空經該州知州張掄文哀求撤兵周顯承不允令遊擊張潤槐往東鄉良平鎮店頭堡堡民閉門不納委

員裴輔晉在彼辦糧啟門放兵勇入百姓逃避死傷無數凡近店頭堡之莊堡多處均被搶掠並路劫布客聲言卽往北鄉聞雷正綰到涇周顯承始行折回仍畱二營分紮南北鄉又將河南解存陝西藩庫協餉銀三萬兩在長武縣庫內帶隊劫去似此喪心病狂倚勢虐民大爲地方之害若不嚴行懲辦何以肅軍律而儆效尤周顯承著卽行革職交趙長齡拏問其同惡相濟之遊擊張潤槐把總裴輔晉均著革職一併歸案審辦趙長齡見由西安赴慶涇一帶著卽將周顯承等提解秉公逐款審辦毋稍寬縱周顯承如有不服拘拏情事或致激成禍變著楊岳斌雷正綰楊能格派兵嚴密防範雷正綰見已到涇著將周顯承招集之潰勇並所部各營妥爲撫馭統帶相機進剿其畱甯州之二營著卽撤回毋任別滋事端楊能格摺片著鈔給楊岳斌趙長齡閱看正在寄諭閒

據楊岳斌奏請派劉蓉節制涇州各營駐紮長武等處一摺劉蓉見已仍署陝西巡撫豈能出省遠駐長武周顯承所招潰勇本係雷正綰舊部仍歸雷正綰統帶自無兵將不習之慮雷正綰受朝廷倚任之重務當振刷精神力圖報稱固原平涼涇州等處均須兼顧若有疏失惟雷正綰是問楊岳斌另片奏曹克忠一軍未能調赴東路伊犁軍械請俟驛路通暢再行補製解往各等語均著照該督所請辦理又片奏請將甘省秦州一帶叛產變賣充餉著卽督飭藩司遴派公正員弁認真經理期於兵民兩有神益毋任吏胥舞弊其陝西各處叛產如何辦理之處著劉蓉迅速妥籌具奏楊岳斌片著鈔給劉蓉閱看將此由六百里諭知楊岳斌趙長齡劉蓉並傳諭雷正綰楊能格知之○諭寄諭陝西巡撫趙長齡本日據楊能格奏周顯承劫餉擾民各節業經有旨將周顯承革

職拏問諭令該撫秉公查辦正在寄諭間復據楊岳斌奏雷正綰部下精兵健卒均經涇州收集若使軍械足用即可責其立功惟與雷正綰互有猜疑暫難合併若迫使聽雷正綰調遣軍心惶惑譁潰堪虞等語與楊能格所奏詞多歧異楊能格所參周顯承各節如果屬實必須秉公執法嚴懲雷正綰業已回駐涇州該提督舊部能否恪遵調度抑或軍心渙散雷正綰竟難挽回趙長齡見赴涇州著卽將雷正綰軍營近日情形嚴密訪查據實具奏如雷正綰挾回自重該將領等無所適從則涇州各營自應另行派員統帶曹克忠威望願著如能接統其眾卽著知照楊岳斌一面奏聞調派如曹克忠不克赴涇楊岳斌卽當另派妥員前往接替毋誤事機該撫於此事務當妥慎辦理不可稍涉偏執以顧大局楊岳斌摺著鈔給閱看將此由六百里密諭知之○甲午諭軍機大

臣等勞崇光張亮基奏清鎮縣城失守旋復一摺逆首何得勝白盤踞開州後分股由修文縣境直撲清鎮縣城賊眾兵單遂於十月十八日失守經全祖凱等會同趙德昌所部馳往援剿奮力攻擊賊勢不支棄城敗遁仍向修文邊境竄去當將清鎮縣城收復辦理尙爲迅速著張亮基督飭在事文武員弁探賊所向跟蹤追剿並檄飭趙德光等軍相機截擊迅掃逆氛此次出力各員准其擇尤保獎毋許冒濫勞崇光因清鎮失守赴滇大路梗塞改於十月二十四日起程見在行抵何處著兼程前進毋得藉故逗留安義鎮總兵趙德昌自署理提督以來於貴州軍務未能辦有起色著張亮基飭令速赴四川交崇實駱秉章差遣委用貴州提督本日已明降諭旨令周達武補授周達武未到任以前貴州提督著趙德光暫行署理貴州軍務緊要周達武所部兵勇著崇實駱秉

章選派得力之員接統飭令周達武速赴貴州新任以重職守將
此由六百里各諭令知之○予貴州陣亡遊擊蔣占鳌祭葬世職
○乙未諭內閣前據汪朝榮劉蓉先後奏參聯捷沿途需索各款
當經諭令楊岳斌秉公查辦茲據楊岳斌奏稱聯捷在陝需索各
節該督已拔營在途無從深悉迫聯捷抵甘肅境內在會甯勒索
供支拆毀廟宇衙署縱令兵勇將牲畜牧放民田殘害禾稼領去
草料變價入已被控之案不一涇州送差車輛牛隻兩旬之久並
未發還任聽兵丁宰殺牛隻棄置車輛毆逐送差夫役各等語聯
捷奉命帶兵出關到處藉詞逗畱已屬怯懦無能大負委任復敢
肆意需索騷擾地方可惡已極此等劣員朝廷不難按律懲辦惟
將該員立予嚴譴聯捷轉得自便私圖置身事外伊犁參贊大臣
調任哈密辦事大臣聯捷著毋庸幫辦成祿軍務降爲藍翎侍衛

交成祿差遣仍著迅帶所部剋期出關剿賊儻敢再事逗留或另有騷擾不法情事即將該員按照軍法治罪決不寬貸○諭軍機大臣等阿克敦布廉至奏熱河咨調馬隊官兵請旨遵行閭敬銘奏拏獲奉省馬賊頭目偷越海口請飭嚴查沿海各口各一摺據稱馬賊竄入朝陽境內察哈爾左翼四旗邊界防務喫重且張家口爲北路要隘見在挑兵鎮壓尙慮單薄所奏自係實在情形所有熱河咨調馬隊五百名卽著毋庸派往阿克敦布廉至務當督飭滿蒙官兵勤加操練嚴防要隘以備不虞熱河兵力本單見值賊氛逼近亟應添兵助剿副將劉景芳所部馬勇二百名前已諭令隨同文祥等進剿劉長佑添調之天津鎮兵五百名應否併歸劉景芳統帶抑或另派妥員管帶徑赴朝陽助剿之處仍著劉長佑咨商文祥福興妥籌調派如恐此軍兵力稍單並著劉長佑再

行酌量添撥以資厚集山東登州海口盤獲奉省馬賊頭目劉瑯先等三名據供在涇州城外與總目康七分手渡入東境勾結匪徒餘眾均在北岸聽信約期搶船赴沿海各處等語匪黨潛謀勾結偷越海口亟宜先事防維所有奉省沿海各處著恩合富平阿恩錫嚴飭各該地方官認真稽查不得任令匪徒偷渡閭敬銘仍當飭令所屬於登州一帶海口嚴密巡緝毋稍大意正在寄諭間文祥福興奏酌度軍情據實覆陳並請調洋槍隊兵熱河地方情形派員辦理團練各摺片朝陽之賊見復竄往東南台吉營子等處離邊已近法庫邊門又有大股賊匪滋擾賊蹤飄忽難保不復圖竄入邊內文祥等擬於行抵錦州後酌留馬步隊防守再行酌量辦理自係穩慎辦法卽著察度情形妥籌布置見在熱河之賊旣已東趨劉長佑所派之兵出邊後如何探蹤截剿之處仍著咨

商文祥等妥籌進止麒慶亦當飭令派出之兵蹣跚追勦不得以賊已東竄徘徊觀望坐失事機甯遠所屬中後所爲山海關門戶著崇厚將備調之洋槍隊兵五百名派護理總兵春霖管帶出關駐紮該處與錦州防兵互爲聲援以杜賊匪窺伺熱河地方伏莽甚多但恐操之太蹙轉致匪黨固結辦理益形棘手劉長佑麒慶派兵勦賊務當密飭帶兵各員酌度情形妥爲籌辦毋稍輕率甯遠所屬團練文祥等卽飭朱光宇等妥速辦理以資保衛本日據寶珣奏奉省派出官兵見賊輒敗虛糜帑項等語該省官兵平時既不訓練臨陣又無紀律以致屢次挫折實堪痛憾著文祥福興恩合認真整頓如查有首先潰退者卽於軍前正法以肅戎行文祥等密片一件著鈔給劉長佑麒慶閱看將此由五百里各諭令知之○諭奉天馬賊自滋事以來蔓延日久未受懲創聞新任署

將軍恩合視賊太易辦理勦撫未合機宜與各部侍郎俱未能和衷辦事本日據寶珣奏稱恩合到任以後勦捕賊匪已由盛京戶部庫內放過銀五萬八千兩該將軍並未將兵冊隨時咨部查覈見於山海關解到餉銀二萬兩內先放銀一萬兩其餘一萬兩擬畱備京兵到省後接濟之用該將軍必欲再領二萬兩不解何意請飭查明等情恩合於派出勦賊官軍既未將名數造冊咨部查覈又思多領餉銀難保無冒濫蒙混情事著文祥福興於馳抵奉省時將恩合到任後所派官兵數目共應需餉銀若干兩徹底查明有無浮冒據實具奏該署將軍究竟能否勝任並著文祥等密行查明迅速具奏將此各諭令知之○諭楊岳斌奏遵查聯捷祔參各情暨西路告急請催大兵出關各摺片哈密辦事大臣聯捷奉命出關勦賊乃敢沿途騷擾逗畱不前實屬可惡本日已明降

諭旨將聯捷降爲藍翎侍衛毋庸幫辦成祿軍務著楊岳斌傳知聯捷迅赴成祿軍營聽候調遣其所帶馬步各隊均著交成祿節制至西路軍情正當告急成祿總未帶兵出關亦屬懈弛著懷遵疊次諭旨剋日西行如不知力圖報稱有意遲延則聯捷覆轍具在必當一併執法嚴懲不能稍從寬貸也聯捷前次奏稱在好水川一帶招撫四十四村回戶匪首馬化澂亦來乞降等語朝廷慮其爲該逆所紿曾令楊岳斌斟酌妥辦見在聯捷已令西行自不敢藉詞撫回再稽進發所有一切勦撫事宜著責成楊岳斌妥爲籌畫務當分別良莠相機而行不得稍有貽誤都興阿等前因聯捷專差佐領德興額持函議撫情節可疑曾將該佐領摘頂拘留畱見在聯捷咨覆已否到甯並著都興阿穆圖善詳察情形與楊岳斌妥商辦理毋墮回匪狡計至雷正綰一軍疊次諭令收合潰卒

重整軍聲力圖勦賊此時若令統兵出關則朝令夕改非特無所適從且恐滋其疑惑殊爲非計楊岳斌所請量爲變通之處著毋庸議鶴齡一軍缺餉軍士困苦顛連甚爲可憫著楊岳斌寬籌餉項源源接濟催令隨同成祿出關毋任逗留其成祿等軍並著楊岳斌設法濟餉俾資飽騰不得稍有缺乏致令有所藉口將此由六百里各諭令知之○諭景紋恩慶奏審據要犯吐多卜降巴供詞並懇請賞給夷喜羅布汪曲公爵各摺片該犯吐多卜降巴於買巴札倉眾喇嘛攢集傳喚之時不能彈壓僧眾反爲首謀將羅布藏稱勒拉木結擅行接回色拉寺院次夜復敢糾聚僧眾七百餘名各佩槍刀器械晉藏搬運財物已屬不法迨釁端已成經達賴喇嘛同滿慶等數次札諭令將已革總堪布及爲首滋事之人交案懲辦該犯不肯交人並派兵築卡率眾抗拒更屬目無法紀

該犯見已據實供認實屬罪無可追吐多卜降巴一犯著卽就地正法以昭炯戒至所請懇將達賴喇嘛之兄夷喜羅布汪曲賞給公爵之處前據滿慶等奏請旋經理藩院議准將達賴喇嘛之父彭錯策旺所遺公爵賞給達賴喇嘛之兄夷喜羅布汪曲業經降旨允准該大臣等未接理藩院行知故有此奏本年六月十一日清字諭旨著鈔給景紋等閱看卽著宣示達賴喇嘛遵照所有商上僧俗事務仍著該大臣等妥為經理毋稍大意將此由四百里各諭令知之○閻敬銘疏薦賢能收令張廷揚等請予升階下部議與例未符 上特允之○賞瑞敏郡王子貝勒載漪三眼花翎惇親王第三子頭品頂帶載瀾花翎○以祥泰爲內閣學士由光祿寺○丙申諭軍機大臣等麒慶奏籌辦朝陽縣街踞匪情形請催援兵會剿劉長佑奏帶兵出省日期各摺片昨據文祥等奏探得

賊取於二十五日由朝陽縣竄往東南台吉營子洛道營子莊頭營子三義站等處地方並據恩合咨稱有賊匪千餘名竄至法庫邊門滋擾距省僅百餘里數日之間賊情忽變又據文祥等片奏賊自清河邊門逸出後分爲三股一竄朝陽一竄赤峰一竄法庫邊門熱河各縣伏莽幾於無處不有等語是朝陽街市之賊早已東竄文祥等摺與麒慶摺同係十二月初一日發麒慶較文祥等更爲切近而摺內有賊未出竄之語赤峰賊情亦未經奏及何以驟贖若此殊不可解著卽確切探明具奏並懍遵昨日諭旨飭令派出兵躡蹤追剿仍須嚴防回竄熱河伏莽徧地若動兵搜捕必致激而生變麒慶務須不動聲色密爲訪拏以期消患未萌毋得因循坐誤再釀禍端劉長佑於初三日出省擬徑赴三屯營與徐廷楷商定布置仍察看緩急親赴喜峰等口督飭巡防令徐廷

楷回古北口辦防並以南路防務仍重防軍未可多調所籌均妥著卽照所請行俟到日察看情形朝陽之賊如尙未退卽著劉長佑迅撥馬步前往會同熱河官軍併力剿洗如賊已東竄並著視何路喫重抽軍前往追剿毋稍遲延昭烏達等盟俟年班到京時面諭會剿將此由五百里各諭令知之尋麒慶奏查朝陽街被匪竄入後雖聞有回竄情形未據帶兵員弁及地方官稟報不敢遽信迨本月初三初五初六等日據各處稟報賊聞兵至陸續出竄與文祥所奏無異朝陽距承德七百餘里較之奉省名爲切近實形竄遠是以奏報稍遲至赤峯境內據該縣知縣李繼昭稟稱並無賊蹤竄入報聞○丁酉 上詣 大高殿祈雪○准頭品頂帶候補京堂薛煥在籍終養○戊戌諭軍機大臣等前據吳昌壽奏豫軍攻復構林關寨並捻股東竄信陽等處當經諭令官文等嚴

防孝感黃陂一帶並籌兵赴豫會剿茲據官文鄭敦謹奏會同豫軍進攻構林關並賴牛等逆下竄情形與吳昌壽前奏大略相同惟吳昌壽前奏張逆股匪業已棄寨向鄧州西北一帶奔竄官文等見擬飭姜玉順等軍由東南一路進攻劉維楨一軍由唐縣拔隊向東北一路進攻著該督等卽飭鄂省諸軍視賊所向與豫省各軍會合四面夾擊以期聚而殲旃賴牛等逆折向東趨在信羅光固一帶肆擾鄂省靳羅麻孝邊境處處喫緊官文等務當嚴飭成大吉所部慎密防守毋令逆蹤竄入鄂疆如賊蹤東竄皖境卽著官文等派兵出境會同皖軍夾剿毋稍遲緩官文另片奏請調裕麟在荊子關辦理轉輸甘省糧臺等語裕麟著准其調赴鄂省辦理轉運事宜並著察看該前任藩司病勢是否實在輕減毋稍遷就將此由五百里各諭令知之○諭張凱嵩奏思恩官軍疊勝

上林大致肅清一摺上林土匪莫風皮等屯踞山砦荼毒居民爲害已久經道員易元泰等督軍進擊將莫山新村通津鯉魚砦等處攻克生擒首逆莫風皮等正法剿辦尙爲得手惟通津匪首周定梆見竄武緣勢必勾結該處土匪希圖復逞著張凱嵩督飭易元泰各軍實力搜捕務將逆首周定梆及在逃餘匪悉數捕獲毋使漏網善後事宜卽著趕緊清釐務臻妥善武緣土匪滋事易元泰已派副將潘忠實等往剿見在上林大致肅清易元泰卽可移軍該處會督地方官剿撫兼施廓清恩恩全境以靖地方將此由五百里諭令知之○己亥諭軍機大臣等楊岳斌奏黎獻營勇潰散並陳甘涼賊勢成祿奏涼州剿賊情形派隊馳援永昌請飭文麟督辦糧臺聯捷奏回目投誠各摺片黎獻一軍進剿肅州逆匪因火藥局失火延燒後路糧臺又被匪攻破軍心不顧旋即潰散

該道員督率無方著先行摘去翎頂以示薄懲見在官軍新挫逆
餒愈張該營存兵僅止二千餘名難成勁旅著楊岳斌一面責成
黎獻收撫潰卒會合各軍協力堵剿重振軍威一面卽飭總兵王
仁和管帶之軍迅速由平番一路節節進剿以爲西軍後路聲援
此時河西三郡賊勢日益蔓延若不早籌掃蕩恐與關外之賊連
成一氣收拾更難楊岳斌務當統籌全局選派得力將弁添調勁
兵實力進剿毋誤事機成祿一軍疊次剿賊不無微勞該提督見
在已抵涼州著卽督率所部迅速西行儻再藉詞逗畱定行從重
治罪聯捷所部各營前已有旨併歸成祿統帶著卽催令前進毋
任遷延鶴齡一軍前經楊岳斌奏請畱於甘肅未經允准著楊岳
斌仍遵前旨嚴催鶴齡一軍隨同成祿星速起行所有成祿等軍
餉需除已飭四川山西籌解外楊岳斌亦當設法源源撥濟俾利

遄行毋令該軍士等有所藉口南山賊匪竄逼永昌成祿已飭馬天祥等軍拔隊赴援並著楊岳斌分兵兼顧毋使滋蔓降調鎮迪道文麟前已令其隨同成祿出關茲據成祿奏稱請於甘肅藩臬中派一人總理該提督糧餉事務並令文麟督辦行營糧臺設局轉運等語著楊岳斌酌量辦理甯靈攻剿亦甚緊要成祿所請飭都興阿派撥馬隊之處著毋庸議至聯捷所稱甘肅回目穆生花陝西回目孫義章率領各路回目遞稟投誠並甯靈兩城回目稟請求撫由聯捷將各回首稟詞鈔錄進呈著都興阿穆圖善楊岳斌斟酌情形辦理此等回眾如係甘心倡逆或曾經踞城戕官焚掠殘殺及屢經投誠反覆難信者罪在不赦斷不可輕行議撫致貽後日無窮之患若其中果有畏禍被脅出於勢不得已者自應准其投誠以示區別總須詳加察看分別良莠不可豫存成見聯

捷所呈回稟七件均著鈔給都興阿楊岳斌閱看將此由六百里
各諭令知之○諭前因逆回有北竄磴口之信該處防務緊要疊
經諭令桂成統帶所部官軍移防磴口俾資扼堵茲據德勒克多
爾濟等奏稱花馬池時有回匪窺探較前尤爲喫緊桂成到防兩
月逆回已出邊數次均經蒙兵擊退權其輕重自應先其所急請
仍飭桂成駐紮花馬池以昭慎重各等語所有桂成一軍卽著仍
駐花馬池地方實力嚴防毋稍疏懈並著都興阿穆圖善酌量情
形嚴飭在防各軍與桂成各軍協力守禦互相援應其包頭鎮添
設官兵二百名著仍歸桂成統轄以期聲勢聯絡寶豐平羅磴口
等處都興阿等均已分兵駐守磴口要隘並經桂成會同貝子扎
那格爾第派兵堵禦惟恐兵力尙單著都興阿穆圖善速行知照
阿拉善王貢桑珠爾默特就近添派勁兵嚴防磴口與在防各軍

會合堵禦毋稍疏虞將此由五百里各諭令知之○庚子諭內閣
前因左宗棠奏閩省鹺綱疲壞請試行票運一年當交戶部議奏
嗣經該部以閩鹽改行票運全議更張恐虧課病民咨令該督妥
籌期於毫無窒礙茲據奏稱自本年閏五月起試行票運甫及半
年所收實解之款已抵前次一年及一年半之數向之疲滯口岸
自試行新章以來漸有商販認辦各衙門一切陋規所裁不下七
八萬兩羣情翕然且釐隨課出皆取之買票商販並未沿海散抽
數月以來亦無私梟拒捕之案從前縣澳官幫坐收課費以充私
橐今則挈向時官吏私攫之款涓滴歸公至閩鹽積欠數百萬兩
見雖專顧課釐而舊欠仍未嘗不按期催繳請仍飭部將試改票
運行止速行議覆等語覽其所奏於閩省鹽綱之積弊及見辦票
運之可行實爲洞悉原委總之鹽務爲國課大宗亦爲奸胥利藪

惟在得人而理斯能力挽頽綱票運之行雖不能保其必無流弊
儻承辦之員均能潔已奉公不爲私計自足以除從前積重難返
之弊而與爲更始該督既稱商情既便市價無增無加額之名而
有裕課之實卽著照所請先行試辦一年俟有成效卽行奏明著
爲定章以肅鹽政而裕課餉○諭前因李鴻章奏已革道員張景
渠聯絡弁兵克復鎮海並甯波紹興各府城著有勞績請將該革
員家產發還當經降旨允准茲據左宗棠奏稱張景渠前在甯紹
台道任內棄所轄地方避賊而逃倉庫錢糧付諸一擲獲咎較重
前次查鈔該革員贓產業經遵旨變充兵餉分賞將士請毋庸發
還等語著照所請浙江前次鈔變張景渠原籍贓產卽著毋庸發
還○諭軍機大臣等德英等奏奉省踞匪漸竄吉境見督官兵迎
剿請飭催山東協餉各摺劉果發股匪由奉省圍場竄出蹂躪四

方甸子並盤踞吉林廳屬一拉溪岔路河等處零星伏匪紛紛四起蔓延省西距省不過數十里富爾琿見帶馬隊百餘名出省馳赴西路迎剿卽著富爾琿統帶所部相機布置實力殲除德英仍一面督飭該團勇等嚴密偵探妥爲守禦以固省防該匪從奉省圍場南面竄入吉林距省甚近且烏志李徐占一均在奉省之東山圍場設再東竄則吉林各城咫尺可到亟應通力合作會籌剿洗著恩合富平阿檄飭將士會同吉林官軍協力進擊前後夾攻爲四面兜撿之計此項馬賊剽疾異常恩合富平阿德英富爾琿務當嚴檄各軍視賊所向步步爲營以期轉戰而前迅殲醜類毋得頓兵不進觀望遷延致令著著落後德英等請將吉林馬隊五百名並由徐州軍營撤回官兵二百六十餘員名馳回原省之處仍著俟文祥到奉省後恩合酌量情形會商辦理奉省馬賊竄入

吉林該省餉項缺乏亟須速籌接濟前撥山東地丁項內協解吉林銀五萬兩著閻敬銘迅速籌措如數撥給派委委員解赴奉省轉解德英等軍營以濟要需此項銀兩解至奉省時恩合等不得截畱致滋貽誤將此由五百里各諭令知之○左宗棠奏臣自聞廣東嘉應州失守卽率親兵及候補總兵楊和貴新右營出屯平和縣琯溪以固漳州南靖門戶遏賊內犯催調劉典全軍由廣東南雄州取道江西南安贛州入閩黃少春由南安贛州入閩而高連陞康國器劉清亮三軍皆隔在賊後無從檄調臣抵琯溪後詢知賊蹤尙未竄動江西各軍尙無出境確信適奉諭旨鮑超一軍仍歸臣節制臣卽咨令鮑超率所部新舊各營一萬二千人入閩分扼武平上杭劉典率所部勇丁八千餘名入閩後徑趨永定其黃少春一軍三千人王德榜一軍二千五百人檄令隨臣進勦旋

據高連陞康國器緘報已尾賊而來由興甯向東北疾趨高連陞已紮嘉應州東北三十里之茅嶺康國器已紮鎮平縣其嘉應州城之西三十里藍口地方聞粵軍方耀鄧安邦駐紮其東南一面賴長所部一千人已進紮丙村對河之井塘與惠潮嘉道張銑所派勇丁三千餘名夾河而守四面布置竊有規模臣見催鮑超由平遠東石徑趨嘉應西北相公亭一帶俟其到防再令扼要紮營延至藍口畚坑一帶以扼其西其藍口見紮之粵軍俟鮑軍到防後當移紮對河之長沙墟一帶憑河而守與丙村諸軍聯絡以扼其南劉典一軍由武平上杭出松源一帶徑抵松口再與葵嶺高連陞及賴長之軍聯絡進扼其東與南高連陞既進葵嶺康國器一軍應卽由鎮平出三圳新埠墟紮石峯徑東連高連陞軍西連鮑超軍以扼其北賊知東西北三面無路可竄必於南路潮州及

豐順揭陽一帶別覓生路而嘉應南濱支河至三河壩而後入汀州幹河以趨潮州故田嘉應以趨潮州水路之要在三河壩而由嘉應以趨揭陽則言嶺關實當其衝粵軍三千餘分扼兩處兵力尙單而帶勇之員弁一爲前署潮州黃岡協副將遊擊何雲章一爲五品軍功容朝章臣慮其不足深恃一面飭其深溝固壘嚴斷接濟一面飛咨廣東督撫飭局趕籌製造礮船以扼水路復飭賴長於三河壩上游一帶河道水淺處密釘木椿深處雇船配槍礮手扼之暫濟目前之急飭潮州鎮翟國彥及惠潮嘉道張銑嚴備城守臣卽率所部由平和出大埔繞三河壩趙松口將水路形勢察看明白然後折而北趨駐營嘉應州北路將東西兩路各軍分勻派紮漸偏漸進迨地近兵多足敷防勦則分兵過河繞紮南路而四面鎖圍之勢可成矣見在署浙江提督黃少春已抵臣營劉

典全軍已抵武平上杭可以漸次聯絡齊進惟鮑超一軍尙未得其行抵何處信息臣已四次飛催此軍入粵以後人地生疏必須廣東設立米局始免缺乏臣已咨請廣東督撫臣委員辦理其月餉由江西籌解伏乞 皇上天恩飭下江西撫臣力籌按月接濟不至如從前新湘長左等營一入閩境卽推置不顧方於大局有所裨益又奏臣查李福泰於粵東兵事向未兼稟臣無從測其虛實不敢妄有論列惟賊由連平上下坪竄走嘉應時李福泰覲然報攻克追剿之功實則並無其事卽此以觀則李福泰專務粉飾可知 上諭汪逆大股竄踞嘉應州城左宗棠所籌均屬妥協著卽日入粵調度各軍聯絡聲勢務將汪逆全股及土匪叛勇盡數殄除毋任再行出竄鮑超一軍前已據奏行抵會昌聽候調遣著該提督卽進兵嘉應會師圍剿聽左宗棠調遣左宗棠有節制三

省之責著於入粵後妥籌調度如江粵各省之兵有疲茶不能得力貽誤事機者卽由該督嚴參治罪瑞麟郭嵩燾卽飭方耀等軍歸左宗棠節制與江閩諸軍聯爲一氣並檄惠潮等郡文武員弁妥籌守禦以防該逆旁竄所需礮船卽飭局趕造以遏水路要衝鮑超一軍入粵人地生疏著劉坤一按月籌餉解濟瑞麟等派令委員設立米局均須寬爲籌備毋任缺乏劉坤一仍當懷遵疊次諭旨催軍出境會剿不得稍存畛域之見左宗棠另片奏遵查李福泰於賊由連平上下坪竄走嘉應時覲然報攻克追剿之功實則並無其實屬粉飾廣東布政使李福泰著先行交部議處並著左宗棠察看如始終不能得力卽另揀委員統帶將該藩司撤回參辦將此由六百里諭知左宗棠瑞麟劉坤一郭嵩燾並傳諭鮑超知之尋吏部議上李福泰請照不應重杖八十私罪降三級

調用毋庸查級紀議抵從之○辛丑諭軍機大臣等恩合等奏賊匪厄竄法庫擾及昌圖戕官劫獄一摺據稱匪首周榮姜三疙疸等率領股匪竄至昌圖廳所屬之金家屯經署通判海盛調集練勇接仗失利該匪遂擾及昌圖焚署劫獄覽奏實深焦憤恩合自簡任將軍以來節經諭令認真剿賊從未擒一賊渠獲一大捷迨賊由朝陽回竄該將軍自應督飭所屬嚴密堵禦乃一聞竄法庫門之信輒將富平阿誦回以致該匪長驅直入竄擾昌圖實堪痛憾見在王起夥眾復由朝陽竄至義州稍戶營子一帶若再不督飭兵弁遏截賊氛恩合等自問當得何罪文祥福興計已行抵奉省著卽與恩合等將戰守機宜熟商妥辦除酌留兵勇防守省垣及保衛 陵寢外其餘均著趕緊調派分股勦辦務將各股匪徒迅圖撲滅聞奉省官兵遇有徵調並不攜帶鑼鍋帳房紮營築壘

所住民房客店離賊盤踞之所甚遠一經催令出戰輒奔馳數十里人馬業已困乏安能制勝無怪賊蹤充斥日漸猖獗福興前在江浙等省身歷戎行諒能諳悉安營之法著卽督帶所部相度地勢前進實力勦洗恩合能否出省著會商文祥辦理文祥惟當會同恩合等將奉省官兵疲玩積習極力整頓如將弁中仍復不知振作卽著從嚴參辦以肅軍律刻下周榮股匪向北奔去昌圖去吉林不遠著德英等就見有兵力會同奉省派出官兵兩面夾擊以收聚殲之效本日據戶部奏遵撥庫銀四萬兩由順天府委員解赴奉省交恩合收存轉交統兵之蒙古王公等支領等語昭烏達等盟馬隊調派若干尙無定數此項餉銀著俟伯彥訥謨祜到奉省與文祥恩合會晤派定兵數再行分別給領此後應需餉項或在近省協撥或仍由部庫發給著文祥等隨時酌覈奏明辦理

將此由六百里各諭令知之○予奉天陣亡知縣海盛祭葬世職
○壬寅諭內閣御史張觀鈞奏統兵大員縱兵殃民情節較重請
旨革職拏問一摺前因楊岳斌查明聯捷在甘肅境內逗留騷擾
各節聲明該員本有應得之咎如何置議俾不脫身事外等語是
以將聯捷降爲藍翎侍衛交成祿調遣仍令尅期出關並嚴諭該
員再敢逗留滋擾卽按照軍法治罪朝廷於聯捷加以降黜而仍
令其出關者所以杜其趨避此中自有權衡並非曲法以行也茲
覽張觀鈞所奏深以聯捷罪重罰輕無以肅戎行而儆貪劣請卽
革職拏問以爲帶兵不法者戒聯捷之罪卽予革職亦所應得惟
將該員拏問來京轉得令其置身事外聯捷著卽行革職暫緩拏
問仍交成祿差遣飭令迅卽出關儻再有不法情事不難將聯捷
按照軍法從事以昭炯戒○予安徽殉難遊擊雙壽陣亡練總周

盛華祭葬世職○予江蘇殉難知縣尙那布李淮建祠副將陳凱等附祀○癸卯命伯彥訥謨祜及年班來京之卓里克圖親王濟克登旺庫爾等回旗會調蒙古官兵協同剿賊○定吉林官員失察賭博處分章程○嚴禁各直省延閣蠲緩恩旨及浮收等弊○子貴州殉難四品封職張憲元建祠○甲辰諭軍機大臣等楊岳斌奏官軍接仗大獲全勝並會甯肅清各摺片鞏昌府城於十月間解圍後該逆仍麇聚城西四十里熟陽城地方復經曹克忠督飭所部張在山等跟蹤追剿生擒逆匪馬魁等多名並將董家堡等處賊巢一律平毀剿辦尙屬得手見在該逆被剿窮蹙訊據賊供有率眾東竄之語著楊岳斌飭令曹克忠迅率各軍分投追剿務期掃盡逆氛毋畱餘孽會甯雖已肅清各路餘匪恐仍乘間竄擾並著楊岳斌檄令李助發等認真搜捕務絕根株將此由五百

里諭令知之○以達慶爲左副都御史

由大理寺卿遷

○廣江蘇泰州學

額四名○予甘肅陣亡遊擊吳德富等祭葬世職○乙巳 上詣

大高殿祈雪○諭內閣崇實賂秉章奏勦平瞻對官軍凱撤一

摺瞻對逆酋工布朗結自道光二十八年以來強梁自逞侵占各
土司地界復敢圍攻裏塘窺伺藏界經崇實賂秉章派令道員史
致康激勵麻書土司四朗汪結等協力接引藏兵節節進剿明正
土司甲木參齡慶亦派兵會勦史致康由裏塘馳赴瞻對調派弁
兵分路環攻將瞻對新舊兩寨全行攻克逆酋工布朗結及其二
子均被焚誅並將擒獲頭人六谷瑪羅布扎喜正法其生擒之東
登工布及其親屬押解回藏官兵陸續凱撤辦理甚屬得手瞻對
逆酋以邊隅小醜膽敢逞其不軌蠶食各土司久爲藏邊之害此
次擣穴擒渠洵足以快人心而申天討所有瞻對上中下三處地

方卽著賞給達賴喇嘛派堪布管理建廟焚修並著駐藏大臣查明奏請辦理收復各土司地方均著飭令各安住牧妥爲安插其卓巴塞爾塔土司旣無正支可襲卽著將該處地方責成麻書土司四朗汪結兼管道員史致康督率員弁漢土藏兵攻剿兩年收功尙速著崇寶駱秉章酌請獎勵出力員弁一併擇尤保奏藏中番官喇嘛等並著駐藏大臣查明請獎○諭軍機大臣等崇寶駱秉章奏剿平瞻對善後事竣漢兵藏兵凱撤西疆一律肅清一摺道員史致康督同番官暨各土司會合藏兵攻克瞻對將逆酋工布朗結及其二子焚誅各土司及難夷等均已各復故地得安住牧卓巴塞爾塔土守備汪慶已故無正支可以承襲責成四朗汪結兼管所籌均極妥協瞻對三處地方已賞給達賴喇嘛卽著景紋恩慶宣示該喇嘛等派堪布妥爲管理毋任再有構釁在逃之

拉旺任曾聞拏投首著景紋等照例辦理此次瞻對勦平之後三十餘里地方一百餘年邊患立見廓清惟善後事宜必須認真經理以期久安長治著崇實駱秉章督飭史致康等悉心妥辦務使民夷相安爭端永息方爲妥善將此由六百里各諭令知之○丙午諭內閣前據理藩院奏請將西藏商上原有承辦藏務掌管黃教額爾德蒙額諾們罕印信一顆頒給諾門罕羅布藏青饒汪曲當經諭令將印信先行解交四川總督衙門封存由景紋察看羅布藏青饒汪曲如能勝任再行承領轉交茲據景紋恩慶奏稱確查羅布藏青饒汪曲協理商上事務爲僧俗等所深服其才堪以勝任等語所有商上承辦藏務掌管黃教額爾德蒙額諾們罕印信一顆卽著景紋等派員前赴四川總督衙門承領到藏賞給羅布藏青饒汪曲祇領掌管以符舊制○諭軍機大臣等劉長佑奏

馳抵三屯營會籌防剿一摺劉長佑於馳抵三屯營後將各口挑濠立柵等工辦理漸次竣事並擬俟續調各起兵勇到日度地分駐相機策應籌辦尙屬周密此時熱河已無賊蹤古北口防務較鬆劉長佑見赴永東一帶查看防務徐廷楷卽著暫行畱駐澈河橋以資督率俟劉長佑回至三屯營後再行商酌去畱熱河之平建朝亦及奉天各地方道路曠遠村戶較稀探報中途無人接遞劉長佑見擬派令書役夫馬出口分段安撥以便速通文報著恩合額勒和布恩錫麒慶各飭所屬地方文武妥爲照料認真經理以期無誤戎機正在寄諭間據清安桂清奏賊匪搶劫監犯並擄掠財物情形各摺金州盜匪僞行投誠恩合並不詳細審察輒准協領穆錦將該匪五百餘人帶至省城深加撫恤又率將軍器給付盜匪令其剿賊致令該匪復行竄至鐵嶺縣城僞行乞降劫獄

放犯焚搶鋪戶省城重地該將軍復漫無防範以致賊蹤潛伏劫放監犯一百六十餘人之多縱火焚掠震驚居民恩合身任將軍不思奮勇剿賊專以招撫誤事任賊愚弄殊堪痛恨著先行傳旨申飭若再不嚴加防範力籌剿捕一味蠶賸顚預自問當得何罪文祥福興計此時已可帶兵抵省著卽督飭將士將省城防守事宜嚴密布置並將劫獄詳細情形查明具奏盛京司獄多三著交部議處桂清未能先事豫防亦屬疏忽著一併交部議處在逃逸犯著恩合額勒和布恩錫嚴緝務獲毋任漏網將此由五百里諭令知之○諭恩合自簡任將軍以來一籌莫展其剿辦馬賊率以招撫爲事疊經諭令小心防範不可墮賊狡計乃清安摺內稱金州投誠盜匪五百餘人就撫後旋即散去至鐵嶺縣劫獄搶掠省城府縣刑部等獄劫去監犯數百名亦係賊匪所爲等語是恩合

既不奮勇勦賊而於詐降之盜復不能嚴密防維致令肆行無忌當此四郊多壘該將軍尙如此一味顛預毫無措置深恐於整頓地方一切事宜不能勝任文祥福興見計已抵盛京卽著將恩合有無誤事情形詳細查明據實參奏毋稍徇隱將此各諭令知之○諭官文等奏官兵攻拔構林關寨大獲勝仗一摺與吳昌壽前奏大略相同此次姜玉順等軍會攻構林關奮勇攻拔並乘勢奪毀元岡等處賊巢擒斬張總愚之弟張鳳先及其子張卯兒等勦辦尙屬得手卽著懷遵前旨督飭鄂省諸軍視賊所向與豫省各軍會同夾擊以期聚而殲旃前據吳昌壽奏賴牛等逆折向東趨在信羅光固一帶肆擾曾經諭令官文鄭敦謹嚴防邊境見在賊蹤竄在何處該督撫等務當嚴檄成大吉等軍將靳羅麻孝邊隘慎密防守毋令竄入鄂疆是爲至要將此由六百里各諭令知之

○丁未以疏防降賊恩台等下部議處○飭閩敬銘嚴查州縣浮收勒折等弊○已酉諭軍機大臣等文祥等奏沿途布置馳抵奉省日期派花里雅春帶兵剿匪請將翼領廣榮等先行摘去頂帶並請飭部撥銀二十萬兩各摺片昨桂清等先後奏到賊匪搶劫監犯並擄掠財物各情當諭令文祥等嚴密布置並將劫獄情形查奏著該大臣等懍遵前旨相機籌辦詳細奏聞以慰塵繫副都統花里雅春既據文祥等奏稱官紳愛戴卽著飭令該副都統進剿逆氛力圖報稱所有吉林官兵並圖明額所帶黑龍江官兵二百餘名暨該縣兵勇統歸花里雅春節制並准刊給木質關防以專責成大凌河馬匹疲瘦經文祥等飭令再三挑換該翼領一味枝梧實屬狡猾牧羣翼領廣榮烏林泰均著先行摘去頂帶勒限三箇月罰出料馬五百匹解赴文祥等軍營應用儻再遲延不解

或解不足數卽著嚴參治罪副都統慶春於所管牧羣任聽屬員
滋弊毫無覺察亦屬不合著一併交部察議所請飭部撥銀二十
萬兩已諭令戶部照文祥等所擬如數籌解此項餉銀爲數至二
十萬兩之多見在道路不靖由京解奉沿途恐有疏虞若能由在
京殷實銀號照各省近來匯解京餉之法辦理較爲妥善見已諭
令順天府妥籌辦理俟匯到後卽由該大臣等分提應用伯彥訥
謨帖卽日由京起程所有蒙古官兵如何調派防剿及餉需一切
如何支發均著文祥福興於其行抵盛京時會商妥籌以期周密
將此由五百里各諭令知之○諭文祥福興奏馳抵奉省請飭催
前調官兵迅速出關等語前因關外馬賊滋擾疊經諭令劉長佑
崇厚調派劉景芳春霖等督率兵勇出關助剿嗣據崇厚奏遵調
洋槍隊官兵五百餘員名交春霖統帶起程並據長善奏查點劉

景芳馬勇一百五十餘名見已到關尙有五十餘名未能歸隊是所調兵勇業已先後啟行見在王起等股匪均在鐵嶺開原一帶盤踞文祥等亟須厚集兵力分投進剿著劉長佑崇厚嚴催春霖等督率兵勇速赴文祥等軍營聽候調遣毋稍遲誤劉景芳馬勇不過二百餘名何以出關時經長善查點竟有五十餘名未到殊屬不成事體著劉長佑迅卽飭令趕緊歸隊如查出該馬勇並無別項差使或係藉詞逗畱卽著劉長佑崇厚催令星速前進毋任遲延干咎將此由五百里各諭令知之○庚戌諭軍機大臣等德英等奏吉林賊勢日甚請調回官兵剿賊一摺據稱劉果發一股由岔路河向西北沙家燒鍋新安堡等處竄去富明阿等進兵追剿先勝後敗經依克通阿等馳往合剿賊始敗遁餘匪自伊通河北伊巴丹站一帶四散歸山德英等以派出剿賊之兵過單馬匹

亦大半疲弱見由富爾琿將此項官兵撤回省垣卽著該署將軍等勤加教練實力巡防如近省地方有警仍當相機督剿毋令賊匪得以蔓延王洛七一股已在昌圖之買賣街長春之黑林鎮一帶滋擾相距長春僅數十里德英等見檄駐紮伊通之官兵移往堵剿著嚴飭該員弁等認真截擊以遏狂氛伊通地方亦關緊要德英等務當妥籌兼顧以期周密至所稱奉吉兩省山內股匪數起或百餘名或數百名均有乘勢舉動之意尤應確切偵探先事防範毋稍疏忽所請將派赴奉省官兵五百名及徐州撤回各官兵全行調回之處前已諭令德英等俟文祥等抵奉省後酌量辦理見在文祥等已抵奉省卽著德英等咨商該尙書酌辦並將剿賊事宜隨時咨商期與奉天官兵聯絡聲勢仍一面就見有兵力妥籌布置不得藉口於地廣兵單致滋貽誤向來六百里奏報專

係緊要軍情德英等此次所發六百里報輒將審明逆倫人犯等及尋常照例事件一併附入殊屬不知緩急著傳旨申飭將此由五百里各諭令知之○諭吳昌壽奏兩路官軍疊勝分兵追剿情形並請將王永慶免調赴甘各摺片賴牛等股匪於七里岡受創後退至光州官渡白鴨江築壘盤踞復分股竄擾商城均經兵勇擊敗其前股匪黨先期竄撲固始縣城者亦經喬松年派兵會合豫軍夾擊殲斃甚多光固以南地多稻田不利馳騁該匪馬隊一經竄至卽爲官軍所創足見制賊須因地利見在賴牛等逆前股已竄往湖北境內後股尙在光山馬賊束於地險不能肆意奔突正宜乘此機會爲四面兜剿之計曾國藩前已派令劉銘傳馳往豫省援剿著卽飛檄該提督迅赴光固會同豫軍合力進攻以厚兵力吳昌壽責無旁貸務當督飭馬德昭蔣希夷等商同劉銘傳

由西北兩面將賊偏向東南斷不可縱令回竄平原致令馬賊任意縱橫又成燎原之勢鄂省黃麻羅田一帶邊界卽著官文鄭敦謹嚴檄防軍認真堵剿不得縱賊竄入腹地致干咎戾潁州一帶卽由喬松年檄令防軍嚴密堵遏以防東路霍六一帶兵力單弱尤恐賊眾乘虛繞路竄入喬松年務當添派兵勇豫籌防範毋稍疏忽並著鄂豫皖三省各督撫互相聯絡隨時相機越境攻剿務期四路進逼聚而殲旃不得各分畛域致誤事機李昭慶馬隊仍著曾國藩速飭赴豫以備追剿之用毋再遲緩至張總愚股匪屢經豫省兵勇在鄧州鎮平等處擊敗該逆見已由新野竄至襄樊唐縣一帶卽著官文鄭敦謹吳昌壽等各飭楚豫官軍會合夾擊速殄逆氛已革副將王永慶前據成祿奏請令其在豫省募勇赴甘當因該革員所犯情節較重已批諭不准行矣吳昌壽所奏竭

緩錢糧等摺均係尋常照例事件並非緊要軍務何得輒附六百里軍報馳遞著傳旨申飭將此由六百里各諭令知之○諭武隆額奏塔城近日打仗情形請飭科布多安設臺站撥給麥糧並土爾扈特兵私行潛逃各摺片回匪盤踞禮拜寺內恃有哈薩克援應牽掣官兵經武隆額派令布爾和德會同轉世喇嘛疊次擊退外援奪獲牛羊無數勦辦甚屬奮勉可嘉見在該逆困踞寺內爲數無多著武隆額督飭各軍合力圍攻悉殲醜類毋任久踞哈薩克貪利助賊情殊可惡惟人數眾多去來無定勢難悉加誅滅武隆額當一面督軍追勦一面設法解散免致勾結爲害土爾扈特親王策林喇普坦所帶官兵輒敢私自潛回游牧此等怯懦無能之輩卽責令勦賊亦必不能得力該親王前經理藩院議請革爵業已降旨允准卽可免其再行置議烏梁海蒙古地方前經錫霖

等奏明添設臺站以便馳遞文報該處見在並無匪蹤且據武隆額差弁尼柯布雙成等往返如常道路並無梗塞廣鳳奎昌何以輒將該處臺站裁撤致文報軍餉等項全行阻滯廣鳳奎昌著先行交部議處仍著將烏梁海臺站趕緊安設遇有文報立時轉遞並將賡音布等管解之塔城餉銀二萬兩迅速派兵護送儘再不顧大局任意推諉定行從嚴懲處武隆額前咨調科布多戰箭鉛丸等件並著酌量撥給以資攻剿塔城軍務緊要兵民飢困亟應撥濟糧食以固軍心武隆額請於科城倉存項下借撥小麥五千石卽著廣鳳等照數撥給護解塔城儘科城存糧不敷卽著派員於歸化城一帶設法採買應需銀兩卽於各省解到新疆餉內提用並著趕緊辦理毋稍延緩將此由六百里各諭令知之尋兵部議上得旨廣鳳奎昌均著照部議降三級調用不准抵銷仍著帶

所降之級畱於該處效力毋庸開缺○復設烏梁海臺站撥科布多小麥五千石備塔城軍糈○以塔爾巴哈台城解圍賞領隊大

臣圖庫爾等花翎○以張兆棟爲廣東布政使英秀爲廣東按察

使

由高廉道遷

○王子諭軍機大臣等趙長齡奏札調已革參將周顯

承等赴陝審辦並密陳雷正綰軍營近日情形一摺周顯承被參各款經趙長齡疊派妥實員弁馳赴涇甯一帶明查暗訪據稱周顯承狡詐把持侵匿帑項尚未得確實證據而於帶隊搶擄滋事釀命各節則眾口一詞怨聲載道是周顯承劣蹟業已昭著亟應逐款查辦以肅軍律趙長齡因涇州係周顯承等屯兵處所見駐西安省城札調周顯承等查訊自係爲慎重起見周顯承本係革職拏問之員如已遵調赴陝趙長齡自不難向其嚴切根究如該革員託故逗畱或抗不遵調趙長齡仍應遵照前旨馳赴慶涇提

集人證秉公查辦該撫如慮到涇州時或有掣肘之處卽著帶閫文忠親兵一營前進督同譚玉龍傳旨將周顯承拏問諒不至有他虞此事務須持平辦理兼顧大局使兵民之心均皆折服方爲妥善周顯承見在涇州督辦各營糧餉著楊岳斌迅卽另委妥員前往涇州接替並著該督嚴飭周顯承恪遵諭旨聽候趙長齡查辦毋得藉端狡展自干重咎雷正綰親隨隊伍據趙長齡奏見止雷恆馬隊二三百名李高起步隊四五百名分駐金積堡等處雷恆李高起二員前經降旨交楊岳斌審辦雷正綰總未將該二員交出亦未將作何辦理情形據實具奏殊不可解著楊岳斌劉蓉等傳諭該提督務將雷恆李高起設法押赴蘭州交楊岳斌審明辦理如敢任意抗延或有心庇護卽著從嚴參辦西安距蘭州甚遠趙長齡奏稱文報往返動需四五十日中途尤慮遺失請將查

辦事件一面據實奏聞一面飛咨楊岳斌查照覈辦等語著照該撫所奏辦理將此由六百里各諭令知之○以雪澤愆期詔刑部清理庶獄飭被兵各省掩埋暴露骸骨○甲寅 上復詣 大高殿祈雪○乙卯諭內閣文祥福興奏遵查大員未能勝任並副都統協領俱難得力請分別降調革職一摺前因署盛京將軍恩合辦理剿撫未合機宜諭令文祥等查明具奏茲據奏稱恩合自調署盛京將軍以來意氣自矜賞罰失當馬賊猖獗莫展一籌且於肆擾情形又復始終諱飾種種貽誤難期振作著卽行革職惟念其前在協領任內捕賊尙爲出力著畱營效力以觀後效協領豐恩聲名平常於賊竄小黑山時帶兵往剿遷延不進著革職畱營差遣盛京副都統富平阿辦事顛預才具平庸著以協領降補至恩合於支放部庫銀兩各節有無冒濫蒙混並著文祥等詳查具

奏其餘隨同恩合帶隊不力各員均著查明參處以示懲儆○

閻敬銘奏請將辦理局務之員破格獎勵等語世襲騎都尉兼一雲騎尉江西候補知縣馬映奎經閻敬銘委辦館陶衛河釐務兩載以來廉潔自矢於軍餉大有裨益並管帶防兵接捕賊匪尤爲出力該員係江西殉難總兵馬濟美之子忠盡後裔能如此辦事實心克自樹立實屬可嘉自應優予獎勵以昭激勸馬映奎著免補知縣以同知直隸州知州畱於江西補用並賞戴花翎此係特旨加恩其餘不得援以爲例○諭軍機大臣等文祥福興奏請調馬隊剿賊等語奉省馬賊蜂起肆擾開原鐵嶺等處官軍分投進剿兵力尙單亟應添調精兵以資厚集黑龍江馬隊雖未可遠調而奉省相距非遙剿賊事竣即可遣撤著寶善迅速挑選精壯馬隊一千名派員管帶前赴奉省聽候文祥等調遣察哈爾參領達

爾濟前在僧格林沁軍營統帶馬隊尙稱得力該員見在已回本旗著阿克敦布廉至卽飭達爾濟挑選舊部兵百名速赴文祥等軍營聽候調遣毋稍遲延將此由五百里各諭令知之○諭喬松年奏賊勢南趨楚軍兵變情形一摺據稱賊蹤由商城偪犯楚之麻城羅田等處探聞楚營成大吉一軍藉口索餉猝然兵變成大吉受傷救出其勇已四出焚掠搶劫等語官文等諒已奏報在途成大吉一軍駐紮麻城本爲楚省東路屏蔽見在賊蹤已入楚境而該軍非但不能擊賊輒敢乘機變亂實出意料之外成大吉統率全軍所司何事著官文鄭敦謹查明因何潰變緣由據實具奏此時潰勇已四出搶掠難保不與賊匪互相勾結愈形滋蔓官文等當責令成大吉設法招集分別遣畱大加整頓重振軍威以資堵剿此次潰變者究有若干營未潰者尙有若干營見當賊蹤偪

近黃麻一帶既無可恃之兵官文等當另行添撥勁旅迎頭截剿毋令叛軍與捻逆勾結深入腹地喬松年吳昌壽亦當嚴飭皖豫各軍會合夾擊毋得任令遠竄儻潰勇有竄入皖豫境內者並著一律剿捕毋稍疏懈前諭曾國藩飭劉銘傳等軍赴豫追擊見在楚軍事既中變恐該逆勢熾益張任意竄突曾國藩當迅催劉銘傳等軍馳赴南路相機進剿毋稍遲誤本日據文祥等奏奉天剿辦馬賊緊要請調烏爾圖那遜統帶土默特本部兵丁百餘名前赴奉省調遣等語著曾國藩卽飭該員迅帶所部馳赴奉天省城聽候文祥等調遣毋稍延緩將此由六百里各諭令知之○廣江西會昌縣學額入名○丙辰諭軍機大臣等昨因盛京將軍恩合於馬賊猖獗莫展一籌又復始終諱飾降旨將其革職畱營本日復經明降諭旨以都興阿調補盛京將軍其甘肅軍務卽令穆圖

善督辦矣見在奉天賊勢甚張文祥福興督帶京兵及直隸吉林黑龍江馬步各隊馳往剿擊軍事正形喫緊都興阿著卽迅赴新任會同文祥等實心辦理並將地方營伍及諱盜官吏力籌整飭以期日有起色惟甯夏軍務亦關緊要兵力本單該將軍接奉此旨迅速部署將所部將士交與穆圖善統帶後輕騎減從馳赴奉省不得抽撥所部帶往致甯夏兵力益形單薄剿辦更無從著手穆圖善既督辦軍務責無旁貸務卽激勵兵勇迅將甯夏府城剋日攻拔以期次第剿除廓清羣醜毋使兵力爲一隅所牽致滋勞費並著隨時與楊岳斌聯絡聲勢會商妥籌以期無負委任將此由五百里各諭令知之○諭奉天匪股王小泉勾結劫獄匪徒在拉古峪等處搶掠經文祥等派兵剿洗擒斬甚多足以振聲威而寒賊膽王小泉曾否殲斃餘賊尙有若干見竄何處著文祥等查

明具奏仍一面確實偵探派兵追剿以清餘孽本日已將都興阿調補盛京將軍花里雅春補授副都統都興阿未到任以前令福興署理所有防剿機宜及地方一切要件均著與文祥妥商辦理福興不得存五日京兆之見致負委任賊股踞吉林不遠該省防務甚爲喫緊署將軍德英到任以後能否振作且亦係本省人署本省將軍是否可靠並著文祥嚴密訪查據實具奏將此由五百里各諭令知之○諭瑞麟郭嵩燾奏賊伏嘉應見籌添軍會剿請將黃武賢等仍留潮州各摺片汪逆竄踞嘉應於城外四面建立土城望臺負隅抗拒瑞麟郭嵩燾見飭曾敏行等軍分紮各路杜賊紛竄著卽檄飭各軍會同江閩官軍通力合作步步爲營實力進剿爲四面合圍之計毋令汪逆免脫乘間竄出復肆蔓延李福泰旣經降調所部兵勇亟須大員統帶郭嵩燾見擬馳赴各營相

度地勢以圖扼守卽著由惠州前赴言嶺關及興長一帶擇要駐紮就近與閩省官軍力籌進剿以期聚而殲旃西北一路平遠相公亭大坪石正一帶可以橫竄江西之長甯又可由平遠北竄龍定西出南雄始興以窺楚境必須勁旅扼守以防該逆紛竄之路著左宗棠等催令鮑超星速進紮相公亭等處嚴密布置遇賊卽擊迅殄逆氛各營需用軍火及鮑超一軍食米著瑞麟郭嵩燾竭力籌辦妥爲接濟左宗棠有節制三省之責嗣後一切軍情著左宗棠主稿會銜具奏甘肅軍務緊要防剿需員西甯鎮總兵黃武賢著仍遵前旨飭令速赴新任瑞麟等所請暫畱潮州辦理防堵之處著毋庸議遊擊李元順著准其畱於潮州以資差委劉坤一著懷遵疊次諭旨迅派官軍出境會剿毋分畛域將此由五百里各諭令知之○調督辦甘肅軍務西安將軍都興阿爲盛京將軍

未到任前以正黃旗漢軍都統福興署理命甯夏將軍穆圖善督辦甘肅軍務○丁巳諭內閣李鴻章劉郁膏奏查明蘇松等屬截除浮收實數並請旨永禁大小戶名目等弊一摺前因江蘇蘇松常鎮太等府州屬額賦太重經該省督撫等奏請裁減按照全額計減去制錢四十萬餘千當經降旨允行朝廷加惠閭閻實足以蘇民困惟江蘇積習已久各州縣徵收漕糧之時每有大戶藉詞抗欠任意短交致各州縣有所藉口而裁減之惠徒以供不肖官紳之朘削而無益於民嗣後江蘇各州縣開徵漕米漕折不准復立大小戶名目其包漕索規等弊著一併永遠禁革如有京外職官舉貢生監仍藉大戶爲名與各州縣爲難營私抗玩卽著該省督撫奏請褫革從嚴懲辦該督撫務當督飭各屬秉公徵收亦不准於例定折價之外稍有浮冒抑勒違則從嚴參辦此旨卽著李

鴻章等勒石遵行並出示曉諭俾紳民咸知感奮一律清完餘著照所議辦理○諭軍機大臣等德英等奏大股賊匪逼近交界吉林省會喫緊請將本省馬隊先行撥回一摺賊陷昌圖之後麇聚在黑林鎮窺伺長春德英等於派往伊通堵剿官兵分撥馬步往援著卽飭令佐領穆克德佈等迅由伊通拔營援應務將長春廳實力保護毋令該匪肆行蹂躪吉林省會逼近賊氛該省無城關可守又且良莠不齊人心惶惑該將軍等惟當設法守險或築土圍備豫不虞不可稍涉疏懈吉林馬隊之在奉省者著文祥福興酌量緩急迅速撥回吉林以利攻剿另片奏徐占一之父徐代元眷屬在吉徐代元見隨王貴等往見伊子屬其竭力報效等語徐占一見在何處所有伊父徐代元往說伊子出力報效是否可靠文祥福興當隨時密訪情形妥爲辦理其眷屬之在吉省者德英

等仍當飭屬嚴密察看毋稍大意原片著鈔給文祥等閱看將此
由五百里各諭令知之○戊午以禘祭 太廟 上前期親詣行

禮○命賈臻來京以兆琛爲貴州布政使

由湖南按察使遷

○己未諭軍

機大臣等楊岳斌奏熟籌甘省分道進剿布置情形並陳雷營兵
變始末遵保堪任糧臺各員派員赴川陝及本省分路勸辦捐糧
各捐片甘省賊眾兵單回匪占踞三城地勢廣袤自應統籌全局
會合陝省兵力分別緩急情形以定進剿先後楊岳斌擬令曹克
忠等先行會攻甯夏令張在山譚玉龍等分路進剿靈州俟北路
平靖後再行南剿狄河等處並請飭令陝省各營分路移紮甘省
防剿所籌均合機宜楊岳斌俟布置稍定後擬卽出省先赴北路
自應首往靈州一帶將此路肅清則甯夏固原兩處之氣可通南
北援應均可靈便仍著該督察度情形何路喫緊卽先馳往何路

援剿至陝省各營兵勇與其防守本境何如進剿甘回肅清鄰疆
卽以自固藩籬著劉蓉卽飭廓定一帶防兵進駐慶陽並飭涇平
各營歸譚玉龍統帶由固原進剿靈州俾回匪各路均有牽制不
得肆出蔓延阻止官軍進攻之路該督所陳雷正綰營兵潰始末
情形較爲詳盡雷正綰前在軍營帶隊奮勇屢克堅城殲除巨股
賊匪朝廷因該提督爲部下李高起雷恆所誤屢經降諭明白開
導曲意保全並令趙長齡馳赴涇州將周顯承與雷正綰交涉各
案訊明辦理著趙長齡卽行馳往該州就近查辦並剴切曉諭雷
正綰令其將雷恆李高起速行交出聽候訊辦不可代人受過致
負朝廷始終成全之至意雷正綰與周顯承同在一路附近軍營
積不相能互相訐告勢必激成事端若令雷正綰前往甯夏軍營
隨同穆圖善辦理軍務該提督與穆圖善前曾同隸多隆阿麾下

共事有年諒可合力同心共爲國家出力此係朝廷曲示保全之苦心著楊岳斌劉蓉斟酌情形速行覆奏如果事屬可行卽著先將朝廷恩諭宣示雷正綰令其酌帶隨身弁勇迅赴甯夏軍營仍著將朝廷委曲保全之意向該提督宣示令其感激圖報並傳諭該提督不可專事招撫懈於防剿致爲回匪所乘貽誤事機至周顯承前在涇州力行防堵並招撫潰勇回營轉危爲安若目以圖謀兵柄等情何以明賞罰而服人心周顯承見已親赴西安聽候查訊尙無跋扈情節其把持誣陷各情有無確據趙長齡馳抵涇州後不難逐細訪查以期折中至當並著楊岳斌繞赴慶涇一帶會同趙長齡秉公查明據實具奏見在涇州軍士議論沸騰趙長齡若不從公剖斷是非但以顛預了事希圖速離陝省設或貽誤大局咎將誰歸至周顯承在涇州以接括糧米爲勸捐恐閭閻被

害者多或致激而生變楊岳斌請令周顯承勸辦糧米殊非所宜
該革員見已赴陝聽候查辦所有勸辦米糧事務卽著責成譚玉
龍辦理如譚玉龍不能得力並著楊岳斌另派妥員接辦見據楊
能格奏稱周顯承前在甯州有帶隊搶掠槍斃生員攻堡淫擄偏
斃多命被害紳民一千餘戶之多等語是否確實並著趙長齡會
同楊岳斌查明覆奏楊岳斌所參楊能格於支放各營月餉不分
勞逸緩急於慶陽防軍糧餉無缺而雷營前敵不過稍爲點綴於
涇州各營竟隔膜相視以致涇州各營勢將再潰本日復據劉蓉
密奏楊能格不顧國家公義罔上行私淆亂黑白等款糧臺支放
餉需總宜相度緩急秉公勻撥該臬司如果有挾私偏袒及與涇
營專事牴牾不顧大局各情卽著認真確查嚴參懲辦見在涇州
軍心危疑恐激事端楊岳斌趙長齡務當秉公密查不准稍涉含

胡鴻露致貽後患懷之慎之至糧臺支發軍餉關繫軍心安危甚重如楊能格實有偏袒誤事之處並著楊岳斌劉蓉隨時參奏涇營缺餉甚久仍著楊岳斌劉蓉設法籌濟以安軍心魏添應所部虛伍甚多此軍既歸楊能格節制何以如數給餉不行查覈著楊岳斌查明具奏一面將魏添應勒赴本任如查有劣蹟再行嚴參一面另派得力之員統帶該營將士至涇營將士既不願歸雷正綰督帶著楊岳斌卽飭譚玉龍統率以釋羣疑而服眾心楊岳斌摺著鈔給趙長齡閱看劉蓉摺並楊能格片均著鈔給楊岳斌趙長齡閱看楊岳斌所派遣員英奎等分赴川陝辦理捐輸糧餉事宜並委員在甘省分路籌辦軍糧等務均著如所請行都興阿昨已有旨補授盛京將軍見尙未經啟行所有雷正綰隨同穆圖善辦理軍務於大局有無窒礙之處並著都興阿穆圖善會商覆奏

將此由六百里各諭令知之○擢李廷樟爲湖南按察使

由山西平陽府

知府

○庚申

上御保和殿賜朝正外藩等宴每歲皆如之○諭

軍機大臣等林鴻年奏維西官軍連克府州城池一摺雲南維西官軍久爲賊匪所困經知府陸希曾等督兵會攻旬日之間將鶴慶麗江兩城先後攻克勦辦尙爲得手見在該員等督練攻打鄧浪機有可乘著林鴻年飛檄迅速進兵爲節節掃蕩之計並飭岑毓英防範省回一面籌辦西路楊盛宗等分路進攻永姚兩處賊巢進規大理至楚雄兵力尙單並著迅籌添兵以資策應林鴻年務當懷遵疊次諭旨迅速入滇相機調度毋稍延緩將此由五百里諭令知之○設巴里坤蘇木臺站飭山西歲撥銀二千兩充經費○是月豁免湖南茶陵等十一州縣岳州等五衛節年民欠額賦並漕折等銀暨會同縣被擾本年額賦蠲緩澧州等十州縣暨

岳州衛被水浙江海甯等四十五州縣暨杭嚴等三衛被水被旱
仁和等十五場被水新舊額賦河南鄭州等六十六州縣被水被
旱山西甯遠廳被旱被雹新舊額賦山東濮州等十一州縣臨清
等二衛被水被旱被擾新舊額賦租課並民借倉穀籽種口糧江
蘇太倉等二十七廳州縣蘇州等五衛被水高郵等二十八州廳
縣暨淮安等四衛被水被旱新舊額賦漕糧緩徵山西薩拉齊廳
被水新舊米石民借倉穀兩淮富安等十四場被水竈地新舊額
賦○會計天下民穀數除直隸江蘇安徽浙江福建陝西甘肅廣
西雲南貴州巴里坤烏魯木齊未經冊報外直隸等省通共大小
男婦二萬三千七百四十五萬八千五百九十名口存倉米穀三百十萬
九千一百五十石一斗八升六合九勺